

黔續

游黔

記書







續 黔 書

張 澍 撰

編主五雲王

編初成集書叢

種一他其及書黔續

中華民國二十五年六月初版

發行人

王雲五  
上海河南路

印刷所

商務印書館  
上海河南路

發行所

商務印書館  
上海及各埠

# 續黔書自敘

武威張 澍纂

辛卯之四月。余既改外職。七月。簪得黔之玉屏。客有過予寓者。輒問曰。黔之天則蠻煙焚雨。黔之地則鳥道蠶叢。其人則紅獐紫薑。其俗則鷓鴣張鼠伏。宦斯土者。邈邈鄙夷之。願旦夕即去。若陋不可居者。今子何眎之易而樂往焉。予曰。予誠不知人之何以裹足於黔。而予之眎黔。則猶齊州也。昔者莊躄盜兵。唐蒙略地。而道通漏臥。臣屬斯榆。迨夜郎爵王。牂柯置守。馬忠典郡。東謝請朝。雖屬羈縻。亦奉征調。二路十二部。李唐乃有貴州之稱。八番十八衛。明世而有專藩之設。泉入聖朝。易椎髻而冠裳之。刊枿芴而郡縣之。剗叩籠而守圉之。百餘年來。蓋浸浸乎濟美華風矣。且其鑱鍋兜儁。可圖王會也。蘆笙箭鏃。可入國風也。木瓜金筑。沿革可稽也。鼈磯龍洞。幽勝可探也。白水碧雲。奇情可詠也。諸葛禡牙之地。李恢塵戰之方。尹珍讀書之宅。山圖尋藥之厓。可題襟而散煩胸也。豈僅睠懷遷謫之李白。客曰。我之所慮者。以其地苗獞叢聚。裸劃左言。不知文字。悍整好殺。攻劫畔亂。不可以中國之治治也。而子又年少。吾是以云。余笑曰。子奇之爲阿。令子其知之矣。虞詡之爲朝歌。宰我其試之矣。夫狃狃狃之屬。亦人耳。昔也聞干羽而格。今則恃爪牙爲難。吾未之能諶也。儻使撫綏有方。恩威兼濟。則可以致其死力。而又奚患之生善乎。馬平主簿孔性善之言曰。谿洞蠻獠。雖常梗化。亂豈無因。昔陳景文爲令。猺獞皆應差徭。厥後撫字乖方。始乃反

側誠使守令得人。示以恩信。諭以旤福。亦當革心。而田禾叔亦云。邊方之官。非有爲不足戢亂。非有守不足服人。非久任不能諳土俗。是誠治夷之寶鑒也。予不敏。翬翬孟晉之矣。客喜而退。知予非徒言之也。今采掇方俗。爲黔中紀聞。以田霞綸先生著黔書。改曰續黔書。次其言爲敘。以正鴻筆麗藻之君子。嘉慶九年六月十五日。

# 續黔書目錄

## 卷一

星野

地界

捍水議

苗警

驛站

夫馬

治盜

毒蠱

假銀

誑盟

茂學篇

修文昌宮記

續黔書 目錄

卷二

祭三閭大夫文

竹王

莊蒙

馬王辯

黑神

北陰神

柴沖大王

李白至夜郎辯

懷白亭

王昌齡墓

謁王陽明先生祠記

十八先生墓

盤瓠

紫姑



卷三

黔中

夜郎

龍標

廢泮柯郡

泮柯江

羅甸

八番

銅仁

苟扁洞

豚水

卷四

萬卷書巖

游紫氣山記

游東山記

續黔書

目錄

重游東山記

飛鳳山

游白雲山記

梵淨山

游飛雲巖記

游黔靈山記

游牟珠洞記

鮎魚洞

諸葛洞

響琴峽

相見坡

聖泉

卷五

多雨

歧舌

醫方刻石

石刻

俗字

川字

釐字

生六男

化虎

呪尸爲魚

石棺

人疴

風鬼

鐘鬪

馬化石

雷擊六人

卷六

官鑄

鹽

茶

女酒

革器

洞錦

鐵笛布

金星硯

神黃豆

鮮笞

燕麥

羊肚菌

降真香

卷七

梓柑

粗

叩竹

重臺蓮

蘭

長壽草

朱草

海棠

蠟樹

卷八

孝獸

豪麻

水馬

小羊

箐雞

人首魚

續點書目錄

鱸魚

小蟹

圓蛇

哪哪

九香蟲

# 續黔書卷之一

武威張 澍爵毅

星野

漢武帝設益州。領越巂。犍爲。牂柯三郡。今越巂。犍爲。屬蜀。牂柯所隸二十四邑。貴陽以上。皆其地也。陳卓謂牂柯入參五度。而班固謂東井輿鬼。秦之分野。西南牂柯越巂二州。皆宜屬焉。常璩華陽國志云。牂柯上當天井。則自平越以上。其爲參井無疑。沈思克獨以鎮遠。銅仁。思州。黎平。爲柳星之餘。夫全楚之分。沅。湘。長沙。武陵。桂陽。零陵。以及白帝。房陵。南郡。江夏。皆屬翼軫。黔實近楚。則思州。思南。銅仁。鎮遠。石阡。黎平。六府。當爲翼軫之餘。非注張也。

地界

玉屏舊屬楚衛。田止軍屯。自國朝雍正五年。裁衛設縣。始隸黔。劃麻沅兩屯歸楚。僅存一平屯。分爲兩甲。一甲二十戶。二甲十三戶。共三十三戶。亦甚畸零矣。而田疇或隸於楚之芷江。或隸於銅仁。或隸於清谿。或隸於思州。毋亦非分置畫井之道乎。然予稽察輿圖。不獨玉屏也。黔之州縣皆然。有所屬鄉邨。去治三四百里者。有城門之外。卽爲鄰屬者。有此州之地。併入他縣。他縣之地。併入此州者。又有管轄之地。中多隔越。或距境一二百里。或隔三四州縣。而地丁名糧。亦隸於他縣者。又有衛所之屯。與民地相連。浸久而

迷其版籍。遇有審訊案件。提拘不至。則曰。我某縣籍也。及於某縣有犯。則又曰。我某縣籍也。盜賊之越貨。禦人有司者。捕之輒歛。忽往來。莫可蹤跡。適足以藪奸誨。雖有保甲。不能行也。甚則越佃占水。訟牒不已。至於爭鬪。殺傷事變。胡可勝言。周禮形方氏。掌制邦國之地域。而正其封域。無有華離之地。誠使畱心國計之大吏。繪圖入告。爲之改其幅員。均其大小。正其錯互。清其軍民。吾知地邑民居。必參相得。有司亦獲以盡其撫綏之方。則訟獄息。而風俗淳矣。昔子輿氏告戰國之君。猶以爲經界不正。則土地不均。穀祿不平。然則正經界固仁政之首務哉。

附舟抵玉屏境詩

書巖環芷水。風景最雙清。樹杪交帆影。山中答櫓聲。蘇塗石寺小。井幹竹樓輕。江上乘舟客。回頭眎使旌。

捍水議

玉屏雖蕞爾邑。爲黔門戶。扼楚咽喉。形勢據其衝要。而城濱大江。每多水患。勝國天順二年。隆慶三年。天啓元年。屢被潰決。入國朝。康熙二十七年。五十九年。泉乾隆元年。二十一年。四十四年。並遭洪流。民居蕩析。近者值雨澤浸多。水輒至康衢。余承乏之三月。陰霖日久。濞江暴漲。驚濤潰薄。水不入闔者僅尺許。心甚憂之。蓋江流自清浪入熊谿。城西有獅子峯。雄踞江口。水無所泄。其怒北有鎮平。玉屏兩山作障。則水不得不折而東。而城當其衝。下流則書巖蓮峯。隔江夾峙。碕岸旣狹。疏瀉未易。勢亦逾奮迅。倘山潦衝溢。則水必不能敵山以行。而與城爲難矣。是吾無止水之防。而非水自潰其防也。吾無容水之地。而非水據



吾之地也。移城以避之。則費巨費巨。則庸愚駭。委城以與之。則殃民殃民。則蒼旻怒。且如國家設有司之。謂何。暇日步郊坰。相地勢。思有以捍之。議自北門至館驛。取江中巨石。砌之爲塘。高一丈。仍於土石堆積之處。掘之以壯江身。俾廊而有容。用工不過百人。爲期不過一月。則居民可免淪胥之患。陽侯不得憑汎濫之威矣。會余調署遵義。不果行。姑存其議。以俟後之克舉者。

附鎮平山詩

蘭若背江開。題襟避暑來。羣峯青鞵。一水綠莓苔。慈竹縈裳帶。簷花落酒杯。坐深雲罨靄。長念咒龍才。

苗警

楚南鎮筸。與黔之銅仁接壤。箐深地阻。蠢苗蠡聚。性獷悍甚。攻闕劫殺。無日無之。每扇爛銅苗。輒與之犄角。壬戌年。穀不登。越貨於路。塗之人咸裹足焉。屆歲莫。鳩合醜類。刑牲壯穆廟。號其魁爲大王。期以正月十六日犯銅仁。玉屏與銅密邇。汛兵五十。前撥三十。駐正大營。存者僅二十耳。城垣傾積。無巖置足守。邑之人讐於竹山之役。嘉慶二年事咸覩覩焉。驚。余謂屏邑雖小。苗不足憂也。龍塘當邛水之衝。界牌扼鬼廬之要。地險旣得。防守斯宜。城北六十里之蠟巖。苟選鄉兵數百。占護山梁。則銅仁施谿。六洞水銀。等山之苗不能至。城南六十里之壩坪。苟選鄉兵數百。碁布澗谷。則南路革谿。天塘之苗。西路新谿。南洞之苗。至則授命。北有平江。鴻波瀾盪。不可以厲。檄漁人而藏其舟楫。苗豈能飛渡耶。余旣以解父老之惶惑。方欲召募壯勇。部署糗糧。執挺以爲袂。徒先會鳳凰廳傅司馬率健兒至。誘其渠擒之。餘各鳥獸散矣。聞違者荆

蠻之叛。黃瓜寨掘地得古碑。有火龍飛入黔南地。二月興工。八月休之。讖既而。神苗起。興義延蔓數郡。縣掘塘屠隴。民受洪荼。合楚師剿之。乃定。歲月悉符。茲幸天奪醜魄。虺毒未斂。吾亦固吾圉耳。藉使木札羣飛。布巾爭舞。銅之苗觀。爨森起。而清江台拱之九股。復響應之上。覆飛鳥。下不見伏兔。勢必燎原。誰其捧海。當事有李化龍。郭子章。諸公。庶可以釋冰弭變。臥鼓安邊。以紓九重宵旰之廛哉。

驛站

黔之地。踈步皆山。上則層霄。下則九淵。其驛站之苦。有萬倍於他省者。如貴陽之東至湖廣。玉屏以至清谿。五十餘里。中有橋頭坡。三家橋坡。清谿至鎮遠。九十餘里。中有蕉谿坡。梅谿坡。白羊坡。鎮遠至偏橋。五十餘里。中有沿沙坡。乾谿坡。谷定坡。施秉至清平。九十餘里。中有鬼門關坡。黃猴坡。小觀音坡。大觀音坡。落蹬坡。中隔一重安江。清平至平越。八十餘里。中有臘梅坡。三十三坎坡。楊老坡。羊腸坡。三郎坡。葛橋坡。平越至新添驛。一百餘里。中有五聖關坡。倒馬坡。虎場營坡。卯陽坡。黃絲坡。裸羅坡。打杵坡。望城坡。又如貴陽之西至雲南。查城驛以至安南驛。一百餘里。中有梅子坡。黃土坡。北極觀坡。盤江河。盤江坡。保甸坡。哈馬坡。安南至新興站。九十餘里。中有馬跑泉坡。烏鳴坡。腊茄坡。江西坡。泥納坡。新興至普安驛。八十餘里。中有望城坡。羅漢坡。爛橋坡。鸚哥坡。軟橋坡。舊普安坡。鉉壇坡。倒馬坡。或石豎狼牙。或峯成劍鏢。或立壁如削。或抽筋如墮。又或盤旋屈曲。鳥道羊腸。又或嶽崿巖巖。魚鳧蠶叢。太行孟門。匹茲匪險。嶠關隴坻。對此則夷。見者駭魄。聞之忧心。然皆顯著奇坂。而佗峻嶺不計也。今雖於重安。楊老。新安。各設腰站。以紓

下游馬力於毛口楊松列當各設腰站以紓上游馬力又將上游舊設之盤江江西坡二驛裁去以關嶺查城尾灑新安軟橋湘滿六驛改設於新路之坡貢郎岱列當罐子窰楊松劉官屯又裁下游黃絲一驛移平越驛於西陽塘而亦非坦塗馬之報勞傷斃死者殆無虛日矣蓋每驛額馬僅五十匹夫僅一百名每馬日支稻穀僅五倉升草一束每夫日支米僅一倉升銀一分五釐是以馬不能飽秣則無以致遠人不能果腹則無以應役又況古人驛馬三十里一置驛多則行速而馬不斃後人持節費之說歷次裁併多有七八十里而一驛者馬倒役逃又何怪乎

### 夫馬

玉屏爲入黔門戶東至湖廣沅州界十里西至思州鎮遠清谿驛雜界二十五里南至湖南沅州界三里北至思州府界二十里東西廣三十五里南北廣三十三里臺域畸零田疇孤離彈丸黑子不得與於邦莒之末而差務星繁兼滇黔兩省郵站夫馬俱有司應付並無幫貼攤派且民人膾貧畜牧甚尠一遇大差有馬之家遑遑居奇每站索價至一兩餘且不能敷用又募僱於湖廣之谿洞而差役路資馬僮口食咸於官乎取給是一馬用銀至一兩四五錢也兼之戶口寥落散處山陬附近城市夫役無多不得不招之遠方或離城七八十里或百餘里皆奔命應募雖官爲給價亦僅依扛擡一日之程其餘遑反守候則皆失時廢事不獲價值之日也有司稍存人心差使卽稠不過苦自賠累而無良之徒且借此以獵民既腴其脂膏復疲其筋骨良可吁也

附輿夫謠

山劍鏢石狼牙冬暉短。郵路賒兩蹀腫。向前爬口無食。身無衣。豈樂此。忘剝膚。破茅屋。藿也無。菜面孃。鳩形婦。三歲兒。嗷嗷口。一思之心。擣臼雪。載塗風。吼地嶺。逾高防顛墜。寒鞞瘵。邢敢淚。肩苦穿。足苦輓。大山坡。鬼嶽嶽。多虎跡。懼不免。晚回歸。得百錢。買米煮溼薪煙。復未果。倦伏眠。縣差來。勢破壁。夢模糊。驚怯魄。出符票。控至驛。

治盜

黔之地。縣峯林立。虧日扶雲。怪石堪當。曝鼈寢虎。散無統紀。如仇相避。又山枯水澹。剛柔數舛。逐隊東馳。環繞不定。生理窘蹙。而衣食以禦人儻。亦形勢使然。雖有猛吏。銳意追捕。迺至不勝犯。不勝誅。何也。聚則扞弓注矢。探丸飛墮。散則牧犢飲羊。摩屨迎貓。皆吾民也。又或郊關之外。毒箐幽崖。我不得而至焉。囊篋腰纏。委之而去。僅以身免。歷險衝危。踉蹌呼籲於有司。弁役疾馳而至。則蹤景消滅。是故始於剝商。漸則官被劫奪。始於攫貨。近則人茹金刃。何可忍言。鹽鐵論曰。水有獮狽池魚勞。國有囂圍齊民消。如之何其聽之也。遵義幅幘遼闊。統轄十三里。每里十六甲。烟火輻輳。地勢險阻。其民桀驁詭譎。染楊酋之餘習。而里甲多巨猾。值趁虛日。輒聯外來。競客標掠錢貨。以爲常。余代庖之日。吏民初以余之少也。而易之。然積聞其在玉屏聲。觀望不敢動。然予之治盜。以虛不以實。每見同寮有獲盜者。輒毀折支體。飲以鹽滷。矐其目。竊傷其酷。而卒莫之能戢者。賊以爲法盡於是。吏亦以爲法盡於是。役亦以爲法盡於是。且議其忍也。

而不肯捕盜。因是益熾。余則不然。受事日。召集里甲。訊其素鷓義者。斥之。選立。愿慤嚴諭之。以杜絕。飲博。謹守堡寨。其容畱匪類者。辜無赦。其有警而不協力禽者。辜無赦。其有被盜而匿不報者。辜無赦。惟里甲。倍償。而又於郵鎮關津。通衢僻路。布令以威刑懼之。於是乃不用捕而用儻。非不用捕也。蓋捕則疏。儻則密。捕則真盜或走匿。而役以局外者當之。巨盜或遠颺。而役以鼠竊者塞之。儻則囊橐何氏。鳩聚何所。肆劫何地。黨羽何人。起發何期。過抵何許。灼然在吾之心目。而又虞儻役之給我也。復擇役之誠諳者。親之。耳目既廣。聲色不聞。彼宵小者。以爲吾之疏之也。乃稍稍露跡。而儻之者。旋至。迅發役捕之。罔不獲。其聚集多人者。親率役捕之。罔不獲。值趁墟之期。微服遶察之。伏壯士於側。近有肆斂者。即禽之。罔不獲。役有不用命及賄脫賊者。痛懲之。責令倍償。其失恭命則重賞之。其渠賊吳賴頭。賽曹操。把地王等。以次就禽。無良之徒。乃恫賊儻。疑余之日出而網羅之。四張也。乃大沮散。遁於桐梓。正安。綏陽等處。後遇桐梓令。衛君天民。問曰。子其以鄰國爲壑乎。余曰。子甘爲逋逃藪乎。衛未有以應也。

### 毒蠱

周禮土訓。掌道地圖。以詔地事。道地。隱以辯地物。鄭康成曰。地隱。若瘴蠱。賈公彥曰。瘴。卽瘴氣。蠱。卽蠱毒。人所爲也。是古昔隆時。卽有假此以惑人者。故設庶氏掌除蠱毒。以攻說禱之。嘉草攻之。禮注。賊律曰。敢蠱人及教令者。棄市。先王鴻術。經世設科防姦如此。但。其所謂嘉草者。今不可得而知矣。宗懷曰。周禮庶氏以嘉草除蠱毒。卽藁荷也。神農經亦云。白藁荷可治蠱。王逸大招注曰。苴蓐。一名藁荷。史記相如游獵。

賦注。闕駟云。蓂且蓂荷。與叔師注同。蓂且。漢書作巴且。文穎曰。芭蕉也。明邱瓊山集羣方鈔。不知蓂荷爲何物。楊用修引急就章注云。白蓂荷。卽今甘露。蓋誤以芭蕉爲蓂荷也。司馬賦既有諸蔗蓂且。又有此薑。蓂荷。蓂且。非蓂荷章矣。古今注。蓂荷似藟苳。而白。藟苳色紫。花生根中。花未散時可食。久置則銷爛。不爲實矣。葉似薑。宜陰翳地種之。常依陰而生。潘岳閒居賦所云。蓂荷依陰是也。夫蠱之於人毒矣。中之者嚼豆不脛。含饈不苦。則腸絞嘔吐。救稍遲則僵。而金蠶爲最。昏夜飛飲水次。光如曳擘。鮑明遠詩所謂吹蠱痛行暉也。案干寶搜神記云。蔣士先中蠱。一作蔣士有儲其家密以蓂荷置席上。忽大笑曰。蠱我者某也。一作食我蠱者乃張小二也。自是解蠱藥多用之。故葛洪方云。人欲得蠱姓名者。取蓂荷葉著病人臥席下。立呼蠱主名也。而草木狀云。吉利草。其莖如金釵股。形類芍藥。交廣獠俗多畜蠱毒。惟此草解之極驗。吳黃武中江夏李侯以罪徙合浦。始入境。遇毒。其奴吉利者得是草。侯服之。遂解。吉利卽遁去。侯因此濟人。遂以爲名。此草想卽蓂荷。特因人名異稱耳。夫九尾之狐。谿邊之皮。螫蝱之歸魚。帝臺之五色石。遊戲之三足鼈。皆能已蠱。然其物如龍肝鳳髓。渺不可得。今則磨鉛汁飲之。卽立愈。無俟問藝法於柳州矣。物類用感志。黔南桂州出錫。蛇粗如大指甲。有金銀星。解蠱毒。西溪叢話云。煎石榴根皮汁飲之。卽吐出愈。又云。以白礬牙茶搗末。冷水飲之。

假銀

銀有十七種。美者有黃銀。出蜀中。其天生牙狀如亂絲。生銀狀如硬錫母。砂銀色理赤光。黑鉛銀得子母之氣。咸真銀也。其假者有水銀。銀草。曾青。石綠。雄黃。雌黃。膽礬。靈草。丹陽。銅鐵。白錫。諸名。皆以藥製成者。

黔市通用銀名垂絲甚潮低而江西流民巧詐滋甚日造僞者非惟給鄉愚且用以欺官長所謂爲盜不操矛戟者也有得者以視余瑩白精好翦之則鉛實僅面皮爲銀然薄如蟬翼真鬼工也以較慕容超之鐵胎奚翅過之案漢孝景時律造僞黃金與私鑄錢者同棄市唐文宗太和三年依中書門下奏以鉛錫錢交易者過十貫以上所在集衆決殺今假銀之罪不下於僞黃金而重於以鉛錫錢交易宜比前代之法置之重典庶可以革奸而返樸也。

### 詛盟

宋遵義軍圖經云。民信巫鬼。好詛盟。嗟乎。此不獨遵義也。黔之民類然。做夏磨嵯。靈談鬼笑。耆老引經。投石結草。偶然魚置。便祀鮑君。無意李栽。競傳愈日。其起於鴟義矯虔之有苗。而至今習跛擊乎。或者曰。小民有情而不得中。有冤而不見理。於是不得不懇之於神。而鬼神之往來於人閒者。亦或著其靈爽。視聽所接。賞罰爲昭。蚩蚩之氓。其畏王鉞也。常不如其畏鬼責。而君子猶有取焉者。謂可以輔王政之窮也。昔蘇公罹暴辛之讒。則出三物以詛爾斯。屈平遭椒蘭之嫉。則告五帝以折中命。咎繇而聽直。何況於里巷之人乎。余曰。惠吉逆凶。福善旤淫。經有明訓矣。若近日所傳地獄之說。感應之書。則佛氏因果之旨也。聖王御世。納民軌物。克迪棗常。彝倫攸敘。範其褻志。敬之遠之。莫不灼然於鬼神之故。而其鬼亦遂不神。是卽所謂神道設教也。而豈聽命之云哉。

### 茂學篇

余攝篆廣順州之日。暇則進諸生校論文藝。率皆條流紛糅。訓辭樸儻。由其采掇陳言。罔知晉學也。乃做古人讚學勸學厲學之文。爲茂學篇以詔之。

余聞之。葛洪曰。學者所以清激性理。飾染質素也。徐幹曰。學者。心之白日也。王符曰。學進於振而廢於窮。顏之推曰。不學者。遇議論得失。蒙然如坐雲霧。劉晔曰。人不學。則才智腐於心胸。由數賢之言味之。學烏可已哉。今夫蒸粟之溫也。不琢之不耀夜。墨陽之勁也。不淬之不刺犀。故欲超萬里於瞬息。必假遺風之藥。欲凌溟漲以泳游。必泛服膺之蟹。是以蠶之不繅。則素絲蝨矣。目之不茶。則吳篚壞矣。海蚌不剖。則靈珠隱矣。崑竹不斷。則元音闕矣。故曰。爲山者。基於一簣之土。以成千仞之階。遷井者。起於三寸之坎。以就萬重之深也。而顧萑詬無志。嵒窳無情。羈神於世務。蠶午於微細。不勤焯掌之勞。甘受盲心之詆。未省牛毛之功。頻召蟬雪之喻。何異狄山之視肉。蹠滂之委蛇乎。且所謂學者。豈弟泥訓。詰摘章句。埒女史之誦詩。內豎之傳令已哉。走蟻覆笠。天胡爲而倚杵。斷鼈步亥。地胡爲而息壤。日月何以有朧胸。山川何以有肺目。鬼神何以有形聲。制氏之樂。何以僅記其鏗鏘。叔孫之禮。何以祇通於縣絕。非可概例諸六合之外矣。太昊稽象。畀以晝卦。燧人因鶚啄。以鑽火。有熊聞鳳鳴。而調律。侯剛觀鳥跡。而作書。邑夷法斗旋。而作輅。芒氏效鼃絲。而造網。是皆大聖人之學乎。神明而發乎物類也。不此之循。而喬宇崑璣之是急。謬髀塌。樽之爲安。以天理爲粉澤。禮灑爲橘櫟。仁義爲桎梏。詩書爲糟魄。必且爭奇弔詭。負刑回冗。華誣脅衆。分徒疑聖。嚮言墜乎典謨。誕思飛乎邪室。妙門爭谷之譚。畫瓶箴喻之旨。競扇風規。徒事藻制。勞思慮而不



知道。費景晷而無成功。是瓊甌瑤釜。無爨炊之用。鏐弓鉞絃。無支屈之能。故曰不聞九乳之音者。不知絲竹之涓助。不服六章之麗者。不知毳屨之縣養也。夫文公多藝也。而朝讀百篇。尼父履度也。而鐵鏹三折。翟烏周歷。書載盈車。句踐憂勞。晦誦竟旦。董謁方外。掌摹籀寫。儀秦游說。股畫裳題。兒寬帶經。以粗糲路。生截蒲以緝編。黃霸下廷尉以受業。邠卿處複壁以劭功。朱穆墜岸。不知馬之幾足。文黨入叢。先試斧之掛樹。用能洞精道奧。窮測微言。且太公望年七十而始學讀。卓爲王佐。曾子七十乃學。名聞天下。荀況五十游學。蔚爲老師。公孫宏四十餘方讀春秋。朱雲四十始學易論語。皇甫謐二十始授孝經論語。終成魁儒。魏舒四十自課。對策升第。爲世所仰。或乃不希炳燭之明。甘蹈夜行。不翼桑榆之效。悵望東隅。則愚不愈而智不贍。世將歐馱之矣。是以六藝備則卑鄙化爲君子。衆譽集則孤陋邈於貴游。故曰覩姑櫛之枝。足以知其本之修巨也。覽汪濊之波。足以覺其源之淵邃也。雞之知將旦也。鶴之知夜半也。運日作日者非之知晏也。猥豹之知雨也。雥巢知風之所起。獮穴知水之高下。騰蛇無翼而翔空。蝓羌無鼻而聞香。豎蠶無口而揚聲。水母無頭目而率魚。鯁帝江無面目而識音樂。皆物之知也。物知之而人不知。則蠶珥絲而商弦絕。賁星墜而渤海決。銅山崩而洛鐘應。嶢山陲而薄落竭。麒麟鬪而日月蝕。鯨魚死而彗星出。問之有罕漫者矣。其何能詳威斗而粹藻兼。注紫囊而答楛泗哉。昔敬仲矚兪兒。新公知滄狸。曼倩喻畢方。廣川識重常。中壘通貳負。劉杳審仲師。元遜曉倭囊。壯武嘆海鳧。方古洞章武之劍。陸澄明服匿之器。崔隲析羊腸之坂。敬宗核顛頊之虛。趙逸證太康之寺。子野考滑題之邦。張善測金鳧之飛。僧儒悉石針之用。江

淹推科斗於周宣。斯徵解罇于於干寶。束之引影娥於洞冥。貽孫實婦跪於渤海。鄭欽悟山銘於卅里。竇儀對乾德於四年。董養歎蒼鷺于狄泉。隱侯定罽孟于東夷。以及辨鯨鯉之獸形。聆角觸之人語。數白馬之祠祭。驗黃蛇之阿嬖。鑿肅伏之尺寸。診玉神之隱見。讀龍門之鳥篆。解苗次之豐碑。何異之。有學而已矣。卽桂露飲能言之龜。女乳灌疏屬之尸。老桑潰元緒之筋。古木烹賈誼之味。萑蒲塞風生之鼻。鐘鼓致商羊之鳴。若酒漬白魚之鮓。肝臟節虬蟲之毒。燒石投獾獠之舌。烏梅煮橫公之鱗。事無前聞。情疑浮誕。然精驗潛効。有同響答。亦由沈研鳥冊。鑽習龍經。故能濬情源於秀逸。發思業之高奇也。人無論智愚。儻搏心揖志。磨礪就業。則精神曉冷。鈍聞條達。猥俗不足以摸蘇。浮名不足以營慧。咸能洞知能之囊囊。極文雅之英雄矣。夫雷震之聲。可寫以鐘鼓。風雲之變。可通以律管。而謂聖心賢臆。著在往錄。抱風合効。詎難黨朗乎。故曰。咎繇雖暗。而與辯者同功。子野雖瞽。而與離朱齊明也。可不學哉。可不學哉。

修文昌宮記

今上卽位之四年。九塗榮鏡。六幕同文。猶復崇儒重道。加意善我。爰允儒臣之請。於畿甸首善之區。建宮以祀文昌。仍沛繪音。飭十三省大吏。董率所屬。於府州縣各建宮虔祀。並頒祝告之詞。用妥神靈。凡以誕敷文德。樂育子衿。潛化頑悍。躋治淳熙之至意也。歲壬戌。余履玉屏任。視事後。簿書稍暇。巡覽郊坰。見屏山東有文昌閣。敗瓦飄零。殘椽傾圮。將委諸蔓草荒烟。慨然興歎。思有以新之。以培風脈。而地衝差繁。供張竭蹶。力弗能敷。適邑紳士咸欲捐資重建。且謀卜地城內。以便歲時用享。原任綏陽鄭廣文。洪孝廉。並

文學諸君造余以碑記請且謂余之不鄙夷其地而樂與敷衽講藝也。夔序子弟莫不爭先淬礪。思執衿道德之固。案轡文雅之場。倘更得昌言以啓其牖。不獨親炙之不安咫聞。漸有以規於遠大。卽後來者聞風興起。順就甄陶。不至偏規改錯。亦所以成挺埴之志也。余曰然。乃進諸君而諗之曰。凡人之學。學爲忠孝而已。忠孝根於性生。而亦本於經術。黔雖介在荒服。文采風流。遠遜函夏。然漢時盛覽。字長通。牂柯名士。與司馬相如爲友。作合組歌。列錦賦。知賦家之心。毋斂尹珍。字道真。自以生於遐裔。未踐庠序。乃從汝南許慎。受五經。師應奉。學圖緯。迪三才。還鄉教授。南域由是知學。孝桓時尹氏以經術選用。歷尙書丞郎。荊州刺史。而應奉爲司隸校尉。師生並顯。平夷傅寶。夜郎尹貢。亦有明德。歷尙書郎。長安令。巴郡太守。彭城相。號南州人士。明代如馬氏心菴。陳氏五粟。研鑽理窟。克紹關洛之傳。而清平孫文恭。思南李少參。篤學超詣。鴻文經世。爲時所宗。夫以獐狃之中。卓然崛起。功業文章。流芳汗簡。而微言懿旨。復有以啓後人之靈府。豈非聖賢非異人任而學之可幾哉。至於精禋邀福。謂可以登桂籍而膺仕版。非余之所期望也。衆曰然。工竣。遂詮此言以記之。



# 續黔書卷之二

## 三閩大夫

玉屏北門外水月菴。有祠祀楚屈大夫。土人傳其國初兵燹時見形。水裔賊爲辟易。故祀之。案涉江篇有曰。乘舸船。余上沅兮。齊吳榜以擊汰。又曰。朝發枉渚兮。夕宿辰陽。玉屏古爲沅辰地。諒當日者。儻徊激浦。淹水容與。采芷沅江。卽大夫所謂僻遠何傷也。予於壬戌夏雨霽來游。刪芟砌草。進謁遺像。乃爲文以弔之。其詞曰。痛九天之夢夢兮。聽皇輿之收績。蓀又不管夫忠。審兮。放江潭而疏邊。羌不能偪逐時兮。衆女謠詠以貢色。緜殛死于羽山兮。雖女嬃猶忌其婞直。幼清安肯涅淄兮。豈靈氛筮箒之能占。時幽昧而捷徑兮。董吾道其何嫌。漁父旣莫我知兮。又誰能與黨人爲緣。瀕于危而不顧兮。終湛淪乎汨羅之淵。鸞皇折厥翼。翻兮。讓鷺駕之追隨。躡驂騶於艱阻兮。驢羸騰驤以驕馳。神龍困于泥淖兮。亡慶雲之被覆。枳棘榛榛而梗塞兮。不得塞若衡而餐秋菊。嚴霜忽貫季夏兮。芳荅喪華而彫天。扶桑鬱其危嶺兮。誰總轡以消搖。睇高些而無女兮。求慮妃之所在。陽侯乘以素波兮。彭咸媵以飛鯨。竟不能遠游延齡兮。求傳說而騎箕尾。嗟正則竟溢亡兮。畱盜豔之嘉藻。何儒臬虧我高明兮。謂揚才以競羣小。詎識風諫之優游兮。引靈修於當道。瞻顧舊鄉以歎歔兮。不忍三戶之煙空。並世旣遘夫椒蘭兮。今又何訾乎過忠。繫余企仰練要兮。覽遺則焉隕涕。欲唱小海之曲兮。欠夷舞于波際。寤堯舜之超軼兮。以耿介爲天姿。何末俗競昌

披兮反離騷而摘詞。斥鷃罔測雲鵬兮。鳩搶榆而笑之。我薦椒糈兮。哀日月。志佩芳棄穢兮。導吾先路。中道不改此度兮。冠切雲之岌岌。行砥矢而言丹青兮。嚴界絕夫非義。儻世蔽美而好朋兮。吾將高駝而遐寄。

附謁三閭大夫祠詩

幼愛離騷豔。深悲正則忠。芳情荃不寤。蟬翼筴何從。壯志彭咸託。讒言鄭襄工。翻來女嬃嘗。誰輔大王雄。畫壁天驚雨。幽篁鬼嘯風。懷沙遂捐節。屬草竟無功。故國東門夢。長江糴米筒。失圖在黃棘。黃棘地名。王與昭王盟約於黃棘。悲回風篇所謂施黃棘之枉策是也。朱子解爲黃塵棘刺誤矣。遺恨滿青楓。沅芷遠遊地。雲冠奇服空。魂兮郢都戀。歸些巫陽逢。三戶蕪城沒。千年典祀豐。肅瞻蕉萃像。白日鑲琳宮。

附水月菴詩

香阜何年拓。空門面大江。濤聲撼佛座。花雨落禪窗。鼈碣苔文繡。璇題雁字雙。芻尼翔鶴樹。甘露綴雞腔。梵唄林中磬。湖音水外砮。青霞鬱寶塢。碧穗漾金釭。坐久烹團鳳。心清聞吠彪。天風吹我幘。延佇望蘭艘。舟外卽平江橋。帆往來不絕。

竹王

夜郎竹王事。班氏南夷傳。詳言之。今楊老黃絲驛。皆有竹二郎竹三郎祠。土人禱祀維謹。田山薑著論。以爲與盤瓠蠶叢杜魄荆尸。悉爲謬悠。蒙竊以爲不然。夫祕電繞斗於符寶。長虹曳采于華胥。東邊吞玉筐。

之燕。姜姬履巨人之跡。載在選籍。難云誣矣。卽徐偃破卵於鵠倉。挾地志鵠倉一名后倉朱蒙感精於河伯羅林之

子。紹統檀君。朱耶之先。載育枯樹。著有前聞。皆可證驗。至若齊頃無野之誕。狸乳羊嫗。囊離東明之生。豕

嘯馬嘯。烏孫王昆莫之擲。飛鳥銜肉以哺之。世羅優比北之降。鶴胎鬪墨以出之。凡此瑰異。豈鄉壁虛造

哉。或曰。子之說信辯矣。水經注云。所捐破竹於埜成林。又云。王嘗從人止大石上。命作羹。從者白無水。王

目劍擊石。石卽出水。無乃奇誕弗實乎。予曰。六合之內。其苞遠矣。幽致沖妙。難本目情。萬像遐淵。思絕根

尋。昔夸父棄策。蔚爲鄧林。蚩尤委械。叢爲楓樹。翠子之經可案已。彼貳師征敵。嶺出飛泉。姜詩養親。室涌

江水。精誠所結。天怛靈驅。又況范文之鯉刀。斫郢廩君之土舟。浮流沙壺。後漢書沙壺之龍語元隆。句麗之鼈

橋獲濟。悉是舊聞。難比影說。知乎此。則啓生疊石。摯呱空桑。事同日習。言非空誣。又何疑於竹王之不自

竹生哉。路史注竹姓出於墨台東筲竹氏後漢樞陽侯竹晏後報怨不改姓加

### 莊豪

史記云。楚威王遣將莊躡從沅水伐夜郎。滅之。遂至滇池。後漢書作楚頃王遣將莊豪。二說違異。案楚威王于周顯王三十年立。至四十年薨。在位十年。至赧王三十五年。秦始取漢巫黔中地。中歷顯王之八年。慎覲王之五年。相距四十八年也。如爲威王時事。則躡在滇已五十餘年矣。何目稽久不歸。攷頃襄王之立也。在赧王十六年。距秦取地十九年。躡之奉使至滇。值楚道不通。當在此時矣。商子弱民篇。荀子議兵篇。韓詩外傳。史記禮書。並有莊躡起而楚分之語。皆不言在何時。韓非喻老篇載楚莊王欲伐越。杜子說

曰莊躡爲盜於境內。目爲在莊王時。呂氏春秋介立篇。莊躡暴郢。高誘注。目爲楚成王時。則又在荆。皆非也。史記作莊躡。荆漢書仍之。後漢書作莊豪。寧陽國志作躡。云楚莊王苗裔。通鑿莊豹注。莊姓。宋戴莊之族。有出於楚者。莊躡是也。亦作豪。蓋豪卽躡。古音相通。字亦相借。雲南志謂豪爲躡之裔者。無據之說也。

馬王

玉屏邑西北有營砦數處。相傳爲馬王遺跡。馬王俗謂馬援也。案五代史。楚馬殷。梁太祖時拜侍中兼中書令。封楚王。後平朗州雷彥恭。澧州向環。辰州宋艷。敘州昌師益等。率谿洞諸蠻。皆附於殷。殷請升朗州爲永順軍。依唐太宗故事。開天冊府。置官屬。太祖拜殷天冊上將軍。末帝時加殷棗安。棗昌。靜江。甯遠軍節度使。洪鄂四面行營都統。唐明宗時封殷楚國王。殷卒。子希範立。襲殷官爵。封楚王。谿州刺史彭士然。案谿州銅柱記作彭士然。五代史作然。非。率錦仁。今銅獎遠。今鎮諸蠻攻澧州。希範遣劉勅。劉全明。案銅柱記無劉全明。等擊之。士然大敗。走獎州。遣其子師曷。案銅柱記師曷。案李宏舉見谿州銅柱。率諸蠻酋降於勅。谿州西接牂柯兩林。南通桂林象郡。希範乃立銅柱爲表。命學士李皋銘之。案五代史作李皋。非。蓋屏邑在五代時爲谿洞諸蠻盤踞。必楚國所置官屬。或馬氏子弟奉王命令。号召糾聚於此。安營立砦。則所謂馬王。乃馬殷希範希廣父子兄弟也。伏波於漢。豈稱王哉。若銅柱記文。稱我烈祖昭靈王。漢建甍十八年。平徵側於龍編。樹銅柱於象浦。蓋希範自言爲伏波將軍之後。尊援爲昭靈王耳。谿洞之民。安知目王呼之。

黑神



神爲唐將南霽雲。范陽籍也。黔人。目其長冠戟須而貌黝。稱之曰黑神。其香火無處無之。幾昇關壯穆等。而其威霸響捷也。亦幾昇壯穆埒。吾想夫尹子奇之復圍睢陽也。爲至德二年。城中食盡。至掘鼠羅雀。延喘堅守。陣雲苦深。衝梯爭舞。公奉張巡之命。犯圍突出。告急臨淮。賀蘭進明昧捍圍之義。腐敵愾之心。坐擁彊兵。無援揅意。猶復愛公魁岸。具饌延留。公憤激慷慨。痛生靈之命。就枯念主將之精。已盡。乃嚴責進。明目忠臣義士之爲。嚙指淋血。射矢浮圖。誓掃烽煙。還滅賊子。志雖未就。不可謂不壯矣。死而爲神。豈虛也哉。顧黔人之祀之者。或目其子承嗣爲清江太守。有惠政也。而尸祝之。又或目其子曾立庶貺也。因相沿而俎豆之。然當壬戌苗變。貴陽受圍。城陷。祗炊黍時耳。而旌旗甲馬。忽見。瞬睨。蛾賊辟易。城獲。目全。矧夫霽澇愆陽。火災癘疫。有所必應。黔之人。荷賜良多。其漚鬱。肝蠻犇走而恐後也。固宜。

增播州道中謁南將軍廡詩

陰風慘澹歛荒郊。訓狐鶴鷓警警。烏雅亂飛烏白樹。雲中甲馬翻靈旂。老巫開門款客入。中塑威神絳袍襲。黝面長牙倒豎眉。猙獰怖人鼻欲歛。短碑斜臥霾煙草。落蘚紛堆待洗掃。獸頭最風已軼殘。漫漶似書唐天寶。居民求雨復求晴。高香一炷插前楹。神果有靈風雨節。種禾種黍多歡聲。合寨斫牛答神意。紙錢清酒鷺白翅。碎匄銅鼓震遠村。粵女蠻童走如織。我亦整衿趨稽首。敬祝苜途無整咎。仿佛似聳神有言。林林暗護放心走。

北陰神

永樂十二季。五谿蠻句合黑苗復畔。阻塞黔楚要路。蘄州衛指揮洪壽隨軍門王鎮大軍五萬分途征勦。壽領兵二千五百爲先鋒。由小洪江進抵苗羅。苗忽蠶至。時大軍未集。壽戰陷重圍。身被七創。連衝五次。不能出。日將旆。苗忽驚駭奔潰。自相踐踏。死者甚衆。壽謂有援兵至。及印跡。見空中人馬迷漫。現五色旗。上有北陰二字。聞追逐之聲。圍遂解。後大軍會於沅江夾擊。壽由五開天柱。追至清水河。生禽蠻長姚老虎。阿泰等百餘人。軍門上其功。奉召陛見。奏聞神膺封爵。而壽授平谿衛指揮。及歸。設祭於家。忽有巫者踵門告曰。奉北陰神命致語汝家。吾本近敦煌一國。爲金人所滅。上帝憫念無辜。封爲北陰神。并念爾思勇。危難之中。故爾相救。巫者且傳其祭享儀制。科文陳設。及牲牢俱用燔炙。大類古時塞外諸國風俗。余至玉屏問諸人。咸言洪姓至今虔祀勿懈云。

柴沖大王

深山大壑。多有神怪。能致雲雨。雖非祭典所載。苟有益於民。卽爲之薦腥俎。猶愈於陳葆之祠。雜縣之祀。故靈感喉泉。虔賽古欖。災回鷓所。敬祝木瓜。著在荆開。協于羣望者也。余至玉屏之五月。田苦旱。聞城東五里有洞。洞有神。号柴沖大王。禱雨輒驗。卽乾封年。亦必少資潤漑。邑人士言邇者神爲天柱縣請去。祈母不雨。余曰。旱旣太甚。苗將就枯。余當譟之以蘇吾民也。乃宿齋一日。豕酒楮帛之屬。必具必潔。晨步出東門。行二里許。路無踐逕。延緣於塍畔。再進。則青壁萬尋。丹崖百丈。趾踰隄。脣腹摩石角。逼仄險奇。不可目足。余手擎瓣香。趙行而上。孫甘兩學博。王縣尉。尙後予五百弓許。不能屣屐也。至是刑牲管血。奉爵酌。

醋盼靄來兮。恆幹臨敷。枉目隙祠。不知神之果鑒否也。仍步至署。遂還內谿。勘地歸塗。次野雞坪。忽山雲樓起。苑風樹鳴。急鋏馬返。豐隆大出。目將其雨。礮礮電影。昇河俱傾。泊入闔。見閩閩之民。憊者以喜。病者以愈也。越三日乃止。優渥霑足。歲以有秋。非余薄德之所能致。信乎神之有勳。普淖黔首。用能吐陰垂澤。不使無鳩也。

### 附憂旱詩

赤日隆隆煎下土。邊田龜拆墨尺五。嗟我柔禾然焦炷。農夫坐視淚如縷。肥遺矯矢旱母舞。未見望舒離金虎。捉來蜥蜴甕底苦。咒他雲興濃霧吐。小兒持枝羣擊鼓。願將肥豕祀田祖。涔涔數點甘露乳。驕陽猶自披雲靄。嗟我農人饑無脯。何暇綢繆破牖戶。安得力牧千鈞弩。射殺應龍飛靄雨。

### 埧埜雞坪遇雨詩

攬轡高岡上。郊遶夕色迷。埃風吹轉蓋。凍雨振沈泥。遠樹冥飛鳳。山名孤篷下野雞。河名歸來父老迓。馬首雲淒淒。

### 李白至夜郎辯

夜郎漢屬牂柯郡。牂柯本且蘭國。在今遵義府。唐屬珍州。在今歌羅寨。李白曾貶戛於此。今桐梓驛西二十里有夜郎城。道臥古碑。字已漫滅。縣治內白故宅舊井跡存焉。余攝篆遵義之日。暇游桃源洞。洞葑最風屹然。鐫曰李白聽鶯處。蓋清流蟻酒醅初綠。暖入鶯簧舌漸調。乃流謫時所詠也。近人謂白流夜郎實

不至其地。據贈江夏章太守良宰詩云：五色雲間離，飛鳴天上來。傳聞赦書至，卻放夜郎回。又據詩云：管云三湘遠，今來萬里餘。謂白泝三湘，將上夜郎，卽聞赦命而還。其說疏甚。夫白之在夜郎也，蓋久而後奉金雞矣。其秋浦桃花憶舊游詩所云：三載夜郎還，於茲鍊金骨也。又烏江畱別宗十六璟詩曰：拙妻莫邪劍，反比二龍隨。蓋白攜妻子就貶所，而宗璟從至夜郎，仍旋鄉里，白送之於烏江也。烏江在今遵義府南八十里，源出黔西經縣之湘洪仁三江，由南思北流，入蜀之涪江。昇詩所謂白帝晚猿斷，黃牛過客遲者，亦符。又不止題葵葉贈辛判官，開醕不昇，棗陵木瓜山諸詩之可徵也。今不觀荆賢全集，輒摭一二語爲譚資，且矜其創獲，是猶詫維摩之取孟堅而遺班固也。

增李白聽鶯處碑詩

宋石騎鯨竟不還，聽鶯遺跡尙人閒。鄉書未剖豫章鯉，明月空瞻飯顛山。鸞雛終期翔焚樹，鈞天那復聆雲鬢。我來未值春風暝，倚酒聊歌菩薩蠻。

懷白亭

遵義城外里許，有桃源洞，洞有懷白亭。明大學士王應熊之所建也。其曰懷者，不知昇吾意之所懷異，亦不知其與吾意之所懷同。但目千百世之下，尙有人焉慨慕而懷之，則白之自有可懷者在也。余嘗讀贈江夏章太守良宰之詩矣，憤九土之橫潰，念二聖之游豫，蒿蒼生之無辜，斥公卿如犬羊，非徒作豪語以自快，蓋其窮理亂情，涉霸王略，故有此箭落旄頭，弧墮天狼之壯志。迨至爲負霜草，蒼昊莫訴，乃思栖蓬

瀛學丹砂。雖有冥鴻高飛不爲弋人所慕之意。而慶幸於日之再中。辰之居正。是仍抱大國之惠。灑沾纓之淚也。而人之懷之者。輒目其詩思之不羣抑末矣。余是目爲之論曰。

昔青蓮目龍蟠鳳逸之才。眼識汾陽。氣吞力士。其襟期可蓋世矣。泊乘醉應詔。倉卒對御。目至尊寵。侃彼飛燕。居然納牖。瞰誨之義。不獨詩詞可被管絃已也。使元宗識其俊杰。實乃天庭。用能嘉謨入告。正色立朝。必不肯倚楊氏之山。炙林甫之手。以孤主知。且可令徽纴之徒。惴心恣志。卽不然。試於曩易。授之戎麾。其時薊門烽火。鞞鼓震天。白也夙笞劍術。訓練士卒。亦足目捍圍敵。摧漁陽之鋒。何至大河。目北無堅城。二十四郡無義士。而洛流嗚咽。河潼染腥。天下事等諸車。犇航沈乎。卽使霓裳舞破。玉壘難回。而身膏塗草。亦當昇臬卿之舌。睢陽之血。同其激烈。共享榮名。乃卒蹇偃不振。飛黃伏阜。空名自悞。齧身蠻荒。其才未竟。其志未申。徒令後之人。目騷人墨客。相稱許悲夫。

坵九日懷白亭登高詩

濛濛秋滿坵。岸幘此登高。鬢插陶潛菊。詩題禹錫饒。江山供斗酒。風雨落吟毫。俯瞰嚴城郭。人家十萬囂。

王昌齡墓

貴州通志云。黎平府開泰縣龍標山有王昌齡墓。齡被謫死葬此。案新唐書。昌齡貶龍標尉。後世亂。巫鄉里爲刺史閻邱曉所殺。是此閒之冢。顯係坵會也。又思南有李渭墓。在萬聖山麓。楚人耿定力爲作誌。銘渭祠前。子孫晨起見之。詣坵所而棚封如故。

謁王陽明先生祠記

澗嘗誦先生何陋軒記之言矣。曰愛憎面背。變亂白黜。浚窳窮黠。外良而中螫。諸夏蓋不免焉。雖彬郁其容。宋甫魯掖。折旋矩矱。猶之陋也。夸之人迺不能此。其好言惡詈。直情率遂。則有矣。世徒目文詞物采之渺而陋之。殊不知也。嗟夫。先生之論。不獨洞物情。直示人目樸。令各返其渾穆之天。而狡慝譎詐之不作。庶典章禮樂。宮室軒裳。可增之目行。不然是無軌輓之車也。又目夸之崇巫事鬼。瀆禮任情。不中不節。期望於來者之移風易俗。是直以天下無不可化之人。以夸之昭質未虧。因其機而利導之。則爲功易而爲效亦速。何今數百年間。醜風潛煽。醇源浸竭。變妄若此。其甚。豈降衷之不恆乎。夫固有以教之也。誠使爲司牧者。倣古歆射讀灋。而教之目。父子兄弟夫婦朋友之經。目戢其椎魯囂悍睚眦之習。俾各安於刀耕火耨。無飢渴死傷之嗟。因示之目典章禮樂宮室軒裳之樂。漸改其椎鬣卉服鳩音獸息之敝。夸雖蚩蚩。吾知其從之也。如冬日之陽。夏日之陰。不召而赴也。乃有司者。罔知福利。競爲貪黷。且目夸之蚩蚩也。而誅求之過甚。夸之人目爲是不足父母我也。規避之心。浸假而爲侮慢。侮慢之心。浸假而爲狡詐。竝其本然樸塞之陋而亦失之。是士大夫無廉恥。而望天下有風俗。不可得已。今者顧瞻廟貌。道範斯在。念先生尙不敢任化理之責。余小子痛俗之不競。教化闕如。用是奮用是懼矣。

十八先生墓

當明之季。永明王由榔。自廣西走貴州。孫可望處之安籠所。新改興義府無人臣禮。從臣昇內侍等咸憤甚。飲

泣計昇李定國共圖可望謀泄可望遣將鄭國拷訊十八人同聲不屈死時人哀之收遺骸葬焉表之曰十八先生墓今興義府城南壘壘者是也碑載從臣則吳貞毓張鑄周允吉楊忠徐極蔣乾昌李元開李順朱議屢鄭允元趙廣禹蔡縝易士佳胡士瑞朱東旦任斗墟也內侍則張福祿全爲國也案明史有給御史林鍾無李順楊忠二人又案欽定勝朝殉節諸臣錄張鑄寧國人刑科給事中鄭允元欽縣人中軍都督府左都督林一作楊鍾湖廣人一作江西人大理寺丞趙寶禹袁州人太僕寺少卿蔣乾昌晉江人翰林院檢討李元開善化人徐極一作忠吏科給事中周允吉錢唐人江西道御史朱議蔡縝一作縝九江人工部郎中一作員外易士佳廬陵人主事一作內閣中書一任斗墟鄧縣人員外郎一作內閣中書林青陽新寧人兵科給事中一作主事共十五人無吳貞毓張福祿全爲國

論曰國運值陽九之會爲臣者質首糜軀無有攜貳詎不稱義烈哉又或潛孤偕亡撥亂圖存吹灰於已寒張律於旣絕使洛陽銅駝不淪荆棘步廣飛鳥弗踐泥沙亦可謂壯懷苦志矣吾觀周王奔竄之難獲衛于召公而姬籙復昌漢宣巫蠱之禍蒙養於丙吉而卯金再振獨惜當日諸臣之未寤晦也然天旣厭德人斯云亡諸臣者胼胝戈甲寤寐大霜犯疾風而表勁契寒松而太節雖杜鵑嘯盡難延魚鳧之封精衛銜殘無補窮桑之壑而邛山同穴先軫莫返其元燐火紛蜚葭宏徒凝其血魂偕碧葬冤籲蒼旻數百年之閒豺虎已化攢墳刺天傷心人望古遙集能不爲之銷神壤末追魄天溥乎

### 盤瓠

狝狎狎狗獐獐等種皆祀盤瓠相傳卽盤瓠後余謂此本依坵之誕說而人信之篤則亦未攷其原也伯

益山海經云。卜明。史記正義引作明。漢書注引作弄明。生白犬。是爲蠻人之祖。卜明黃帝之曾孫也。而應劭范蔚宗遂謂

高辛氏之犬名曰盤瓠。妻帝之女。生六男七女。搜神記謂賜美女五人。生三男六女。非妻帝之女也。自相夫婦。是爲南蠻。抑妄矣。夫

公子蠟。蠟詎誦阿房。大夫蜺。蜺何畏蠟氏。白犬之稱。殆猶豹奴虎狔。矜其雄俊。狗兒犬子。志其愛憐云爾。

豈真是緇非素。護跖憎堯哉。世固有指名相反。稱謂不倫。搏虎馮婦。不是明雌。亭侯王嗣。越妻非同先雄。

孝女儻。謂号是縣。蹠必然叩氣。則景升兒子。早隨巨公。臺中鄧何。曾赴上蔡矣。夷考肇錫。證諸羣經。狼貪

傲狠。被目饕餮。檣机之稱。則狗苟蹲踞。比之韓盧宋讎之族。未爲不可。誰或非之。今者馬養鷺之閒。逞逞

廟貺其像。叩槽而祭。是猶掀伍子胥之髻。而續西門豹之尾也。亦大可莞已。案魏略武都氏其種非一。皆稱盤瓠之後。搜神記今吐蕃

乃盤瓠後。又案黔中五谿長沙開爲盤瓠後。其在峽中巴梁間者爲廩君後。

紫姑

劉敬叔異苑云。紫姑。本人家妾。爲大妻所逐。正月十五日。感激而死。故世人作其形於廁。目迎之。祝云。子

胥不在。曹夫人已行。小姑可出。子胥。聳也。曹夫人姑也。又宗懷荆楚歲時記云。望日之夕。迎紫姑。目卜。將

來蠶桑。故占衆事。今黔之各郡。不聞有此俗。獨玉屏於元宵。小兒女用帕巾蒙筭箕。簪以花朵。兩手托之。

問衆事。蓋猶是楚之遺風也。案白澤圖云。涵之精名卑。狀如美女。而五行書又云。廁神名後帝。搜神記云。陶侃見之。



# 續黔書卷之二

黔中

黔中之置郡也。當秦昭王之二十七年。爲周赧王之三十五年。取楚之巫黔中地而置也。所理在今辰州四十二里。黔中故郡。漢高帝四年。改黔中地爲沱陵郡。移理武陵。卽今辰州。沱浦縣是。始元二年。分天下爲十三部。沱陵郡屬荊州部。後漢時。沱陵郡屬蜀。昭烈沒後。屬吳。晉平吳州郡。雖屢有更易。而武陵常屬荊州。劉宋時。武陵領於郢州刺史。隨開皇初。廢沱陵爲朗州。大業初。復置唐武德四年。置黔中。唐黔州本漢涪陵縣。理晉永嘉後地。沒蠻蠻帥田恩。以地內附。因置奉州。建德三年。改爲黔州。太宗三年。又改。貞觀元年。復以黔州之都上縣開爲黔安郡。因周隨州郡之名。遂與秦漢黔中地。犬牙難辯矣。見元和志。南唐置巨州。九年。以隨牂柯郡之牂柯縣置播州。十一年。罷黔州都督府。置莊州都督府。先天元年。廢播州都督府。復置於黔州。開元二十一年。分天下爲十五道。設黔中道。置黔中採訪使。治黔州。大曆五年。改巫州曰敘州。改業州曰獎州。元和二年。廢珍州入溱州。思巨。費。播。溱。錦。敘。獎。八州。皆隸黔中採訪使。宋初因之。止存彭水。黔江二縣。省洪杜。洋水。信寧。都濡。入於彭水。是則秦之黔中。卽漢之沱陵。兼今湖南常德。辰州。沅州。寶靖。諸府。並包今貴州。思州。石阡。銅仁。黎平。思南。諸府也。唐之黔中。亦兼今黎平。鎮遠。遵義。思南。銅仁之地也。若宋之黔中。並及四川重慶。彭水。諸縣也。胡渭生以黔中。寧夷。涪川。播川。夜郎。義泉。溱谿。七部。皆梁南徼外蠻夷。非古黔中地。而呂杜佑說爲誤。不考之過也。

增黔中曲十三首

南來步戰楚莊豪。水下牂柯起怒濤。一自滇池有王屋。夜郎印綬委蓬蒿。

衣皮散髮是烏蠻。鬼主家家禱祀還。四譯難通七部落。阿羊卜漏昇夔山。

嬋娟者子好樓居。鬢髮如雲鬢翠裾。十二珠璫墜耳後。竹筒何似礙朝梳。

紵布裙衫腕地垂。盈盈卯女賦梅遲。門前尢吠如寒豹。莫是蕭郎叩竹籬。

合賽聲喧說砍牛。阿爹抱得負薪憂。文康集有良方在。鑄石曾留笛竹郵。

老雅關上老雅嘍。澀勒林端日已西。問道行人晨飮未。舟坡犖确路高低。

梔子坪邊足春光。雜花生樹鬪鸞簧。短裙窄褻龍家女。踏月吹蘆空斷腸。

斗大山城景物熙。雨風風雨竹王祠。迎神一曲鳴銅鼓。審酒滿斟倒接羅。

雞翁山上碧雲圍。釋燕河邊白鷺飛。莫道羅施風土惡。芋毛稻尾鰕魚肥。

椎埋不復趁斜曛。白晝摸金各飽分。寄語彊弓休貫矢。舟途拾得聖婆裙。

山雲如墨水如湯。竹笳橫空鳥路長。閒向焦谿看浣布。蠻娥兩足白于霜。

誰家花樹最葳蕤。鐙火元宵處處嬉。幾隊笙歌小男女。靚粧不是鬧娥兒。

淫霖圍圍少晴天。吠雪蒼黃事偶然。見說紅花浮瘴氣。滿斟卯酒疾能蠲。

苗婦高髻常橫比余

苗俗處女疾奔不藥

惟殺牛禱鬼

關在安南縣南里許入滇舊路兩崖之間最為扼要

龍家有四狗在

竹一曰狗在

清平楊老

夜郎

南尼君長目十數。獨夜郎爲大。楚頃襄王遣將莊襄伐之。軍至且蘭。楸船於岸。步戰滅之。豪遂留王滇。旋夜郎仍自立爲侯。漢孝建元六年。遣唐蒙通夜郎。元鼎六年。平且蘭。遂平南尼。侯迎降。錫目王爵。後仍殺之。置牂柯郡。後置益州。以牂柯屬焉。荀悅云。夜郎。犍爲屬國也。其地在湖南。東接交趾。漢爲縣。屬牂柯。正義云。今瀘州南。大江南崖。協州曲州。本夜郎國。晉永嘉二年。分牂柯立夜郎郡。領夜郎四縣。宋齊隨因之。唐老德四年。析巨州之寧巨縣。置夜郎縣。貞觀八年。析巫州之龍標縣。置夜郎。十六年。開山洞置珍州。亦置夜郎。天授二年。又析夜郎置涇谿縣。長安四年。以龍標所析之夜郎。涇谿二縣置舞州。是今石阡。思南。爲巨州之夜郎也。今黎平。鎮遠。爲龍標之夜郎也。今桐梓。正安。爲珍州之夜郎也。若秦漢時之夜郎。則西距邛笮。東接交趾。地凡數千里。今人徒知遵義之爲夜郎。亦不知夜郎之大矣。

### 增阜筴坪詩

將軍旗鼓此屯營。焚洞風煙蕩掃清。我抱蒼茫懷古恨。揮鞭一問夜郎城。康熙十九年。定遠平寇大將軍。貝子章泰統征南將軍。穆占綏遠將軍。蔡毓榮。建義將軍。杜興珠等。自翻廣克辰龍關屯營此地。取貴州云。

### 龍標

黎平。秦爲黔中郡地。漢爲老陵郡地。至梁於溲巫縣置龍標縣。隨屬沅陵郡。唐老德七年。置龍標縣。貞觀八年。置巫州。析龍標置夜郎。朗谿。思微。三縣。天授二年。改巫州曰沅州。析夜郎置涇谿縣。長安四年。分沅州之夜郎。涇谿。置舞州。舞州。即今鎮遠。是沅州。即巫州。巫州。即龍標縣。在沅州之上。鎮遠之下。境壤相錯。

卽龍標縣地也。又案開元十三年復改沅州爲巫州。大曆五年改巫州爲敘州。敘州卽今黎平。亦卽龍標縣地也。玉屏舊屬沅州。其爲龍標縣地無疑。案王昌齡貶所爲今黎平之龍標。非沅州之龍標也。

### 廢牂柯郡

漢元鼎六年平且蘭。遂平南。置牂柯郡。後置益州。呂牂柯屬焉。始元二年分天下爲十三部。武陵屬荆州。牂柯屬益州。都後漢州郡因之。晉永嘉二年分牂柯太平。夜郎二郡。劉宋時牂柯平夷。夜郎屬寧州。隨開皇初置牂柯郡。廢蒼陵爲朗州。大業初復置。唐肅德三年呂牂柯首領謝龍羽地置牂州。貞觀元年呂隨之牂柯縣置朗州。並析置恭水。高山。貢山。郎施。柯益。釋燕。六縣。九年呂隨牂柯郡之牂柯縣置播州。今平越所轄數處卽故郡地也。案牂柯字形各書不同。前漢作牂柯。後漢作牂牁。常璩華陽國志亦作牂牁。隨志作牂柯。郢忠恕作戕戕。韻書作棧柯。或作椿柯。亦作戕戕。然漢書西南。傳及宋晉志俱作牂柯。亦當以牂柯爲是。管子中匡篇有南至吳越巴牂牁之文。是牂柯春秋時已有。或係後人附會。

### 牂柯江

十三州志云。牂牁者江中山也。水經注云。牂柯江中兩山名。異物志。牂柯繫船棧也。其山在海中。小而高。可以繫船。俗人謂之越王牂柯。遠望甚小。石高不似山。望之似爲一株樹在水中也。班史以牂柯爲楚莊豪伐夜郎。楸船處。漢初卽於是地置牂柯郡。持目地。屆荒服。桑欽酈道元輩未嘗一問津。宜其於江流原委。略而不詳。後之人或以烏蒙七里關水當之。或目烏撒之盤江當之。或目定番之濠潭當之。而總未覈

也。夫七星關之水，固東出烏江，不注可渡河矣。可渡源發金沙江，來自吐番，由雲南之麗江塔城關入中國。經鶴慶、姚安、東川、峽定諸府，至四川之敘州，昇岷江，合入於東海，非若盤江之從粵入南海也。且盤江兩山夾峙，波濤湍盪，蛟龍魚鼈之所不窟，而謂可操舟耶？若定番之濛潭，雖注泗城州而入粵，而不能入番禺，且涓滴流也，亦昇史記所記廣數里者不符。吾聞唐蒙之風諭南越也，蓋嘗蹤跡之，以爲夜郎臨牂柯江矣。老帝遂拜爲中郎將，從巴蜀笮關入，因見夜郎侯多同，聽蒙約束，還報曰：爲犍爲郡。發巴蜀卒治道，從犛道指牂柯江。今播州夜郎地也。犛道又昇播近，則牂柯江卽烏江無疑。余弭節遵義，至城北九十里，有蒙渡橋，爲黔蜀要路。父老傳其卽蒙發卒治道處云。常璩南中志云：談指縣有不津江，江有瘴氣，案謂牂柯有沈羽之流，不知當今何水也。

### 羅甸

季漢諸葛亮南征，蠻長濟濟火佐禽孟獲有功，封羅甸國王。此羅甸立國之始也。唐元和六年，羅羅鬼主上表請盡歸牂柯故地，開成元年，鬼王阿佩內附，會昌中，封其別帥爲羅甸國王。世襲爵。宋開寶中，普貢納土，襲封如故。元至元十五年，羅施鬼國主阿榨內附，詔授安撫司。十七年復叛，左丞李德輝諭降其酋長阿察，奏鬼國爲順元路。日阿察爲安撫司。至阿晝日軍功，授昭勇大將軍，佩三珠虎符，爲順元等處宣慰使。加羅甸侯。世居水西，有爵土，嚮翠卽其子也。後爲安氏。明洪武四年，嚮翠歸附，授貴州宣慰使。翠死，都指揮馬某欲盡滅諸羅，爲郡縣。翠妻奢香奔訴太祖，願效命，遂率諸羅開偏橋東水道。日通烏蒙烏撒。

及容山草堂諸境。且立龍場九驛。以通巴蜀。而西南益關。卽濟火之裔也。入國朝。安坤搆亂。討平之。目水西爲黔西府。今改比喇爲平遠府。今改大方爲大定府。烏撒爲威寧府。今改蓋自濟火至安坤。歷四千四百餘年而亡云。

增明楊慎羅甸曲四首

山園羅甸國。水繞滴澄橋。橋下東流水。可惜無蘭橈。  
蠻樹不凋葉。蠻雲不放晴。長亭望不見。何處是查城。  
寒鐙悶孤館。陰雲鎖重城。長夜恆思曉。久雨恆思晴。  
林閒山胡鳥。聲聲號我舟。何似故園裏。花亭聞杜鵑。

八番

八番者。大龍番。小龍番。臥龍番。洪番。程番。石番。變谿合誌。石番作金石番。盧番。章番也。五代時。楚王馬殷遣八姓帥率邕管柳州兵討兩江谿洞。至此畱軍戍之。遂各分據其地。号八番。宋初以來。有龍番。方番。張番。石番。羅番。号五姓番。世奉職貢。受爵命。龍氏於諸番最大。其貢奉尤頻數。元符二年。又有牟章番入貢。詔目進奉人章公憲。公利等爲郎將。諸番部族數十。獨五姓最著。程氏。章氏。皆比埒五姓。又号西南七番。元至元十六年。設順元路宣慰司。隸潭州行省。遣兩淮招討使。經歷劉繼昌。招降八番。俱授爲安撫司。自宋迄元。龍番分爲三。而張番之裔無聞。明設程番府。後移府於布政司治城。萬曆十四年。改州。領長官司十七。國朝康

熙五十年革盧山司五十七年革大華司雍正七年革洪番司今設者程番司章番司盧番司臥龍番司大龍番司小龍番司金石番司上馬橋司小程番司麻嚮司方番司木瓜正司木瓜副司凡十四也

### 銅仁

郡之西南隅有銅巖鬱然高峻昇雲氣相連接下有銅仁江白沙如米青石似魚洵嘉境也省志言笱有漁人沒江底得三銅人挽而出之郡目此得名又載播州銅佛寺有七銅佛一夜皆失思南漁者得其四建金仙寺奉之銅仁得其三想即以江中之所得者爲播州之所失也然銅之得在元時播之失則明嘉靖十四年歲月不符且江之得者三播之失者亦三仁者二人也何錫名又不實乎蓋郡舊爲錦州元始置銅人大小江等處其曰銅仁者則明洪老初改之之誤也或乃以播州之失者牽合之何其謬昇

### 苟扇洞

今永豐州之羅斛東六十里有洞在山巔寬敞幽僻人跡罕到相傳葛洪鍊丹於此余案葛洪本傳洪以年老欲鍊丹以祈遐壽聞交趾出丹求爲苟扇令至韶州爲鄧嶽所留不得還乃止羅浮山修鍊是稚川未嘗至交州也何爲有藥竈之遺夫臨賀之石雷公磨刀涇州之堆夸父振履軒轅鑄鼎于鼎湖委波皆是重華播琴于歷眸顏阜都君大抵皆妄者所傳也一統志句漏山在梧州府北流石峯千百從平川中也案句漏山以在梧州者爲是貴州羅斛雖與粵西接而不與北流相直志又云洞有三石室葛洪嘗修鍊於此又有丹竈八仙石則亦傳聞附會之言未質之本傳也

### 豚水

海內東經云鬱水出象郡而西南注南海。入須陵東南。案鬱水卽豚水也。漢地理志云牂柯郡夜郎豚水。東至廣鬱。又云罽封温水。東至廣鬱入鬱。又云鬱林郡廣鬱鬱水。首受夜郎豚水。東至四會入海。水經云温水出牂柯夜郎縣。又東至鬱林廣鬱縣爲鬱水。又東至領方縣。東昇斤員水合。東北入於鬱。注云鬱水卽夜郎豚水也。又案豚水亦卽牂柯江水。華陽國志云牂柯江水出南徼之東。通四會。至番禺入海。是鬱水卽豚水。豚水卽牂柯江水審矣。牂柯水卽鬱林江。卽駱越水。亦名温水也。豚字班氏西南夸傳作遜。蓋字通也。遜又作遂。故歸匪易遜卦之遜之作遂。山海經豚作逐。郭注逐古豚字。案逐當作遂。易之彖爲豨。神豨卽大豕也。可知逐之宜爲遂矣。



# 續黔書卷之四

## 萬卷書巖

水經注云。積石河北有層山。山甚靈秀。縣巖多石室。室中有積卷。而世士罕有津逮者。謂之積書巖。巖堂之內。時有神人遺還。武陵記云。天門山巖中有書數千卷。見而不可取。伏滔北征記云。皇天場古陶穴。藏書二千餘卷。異苑云。百丈山中有石房。內有石案。置書二卷。荊州記云。小西山石穴中有書千卷。相傳秦人於此學。畱之。故梁湘東王云。訪西陽之逸典也。余載念前言。每思御飈輪而上。尋瑯嬛福地。培守門之犬。讀玉京紫微金真七映一作丹書紫字諸祕籍。而遇嗇緣慳。未之或覩。又念乏壯域之方聞。慚安世之善記。卽有玉版奇文。瑤壇怪牒。亦嘗視芒胷矣。夫羽陵蠹簡。牧德靈符。羣玉爲庸成之策府。宛委有高密之元經。是名山者固儲書之石室。貯典之蓬觀也。玉屏邑東一里。高峯峭壁。疊石千層。儼若牙籤萬軸。橫亙江左。則萬卷書巖也。余旣不得讀中祕書而來此。何敢薄民社爲粗官。但一行作吏。此事遂廢。每當敲撲。犯慮牒訴裝懷之時。登臨舒嘯。坐擁萬卷。不啻南面百城。而塵容俗狀。俱爲之一洗。是亦懸宦之至樂也。

## 埵詩

祖龍劫火不到處。長恩潛在深山語。怪牒靈文媿皇墳。不計渾沌何年貯。天目層石作金題。霹靂不掣勞

黠鼠。獐獠詎識靈寶方。徒墜蠻荒誰企佇。壬戌之夏我清暑。一笑此中字堪煮。擬將闕斧倩巨靈。鑿破幽崖之岨嶢。龍威僵走赤雀飛。露出尊盧古時楮。水煎青鐵磨險麩。寫遍雲膜字如柔。語奇文奧驚鬼神。借人可博束脩犂。執意撈犂妒我心。鋸斤未試風靈阻。謨觴洞兮竟鑰封。濤聲日夜護江渚。

游紫氣山記

管柳柳州之記遊也。曰奧曰曠。竊謂此兩言者不獨嶽山之景。兼得山之理焉。黔固山國也。而玉屏之西境。險黎平昇粵爲鄰。連峯複嶺。彌望不絕。然或則魁父無丈之材。或則單椒無曲之樹。求所謂奧如曠如者。不可多得。今夏伏日。埃鬱。銜齋。峭潔。赫曦逼人。王尉露謂城西隅紫氣山。雅宜游暑。遂觸熱往。不半里。見阪陀回互。岡巒起伏。雜花叢於層石。古柏蔭於疊崖。涼颺徐來。煩檢頓滌。實仙靈之館也。爾其清谿環鳴。瑟雞叶韻。苕藻漾潔。游甲浮空。樹入牀前。橫藤礙路。山來鏡裏。鳴鳥依人。予亦不自知其何目。目不周。翫情不給賞也。嗟夫。辛圃銅柱。君山玉臺。姑射尋仙。空桐訪道。誠棲霞之逸志。或齒屐之寓言。孰若此山。境鄰城市。不染霧氛。楹不待遷。日自隱難。田鋤芝而鳥耨。泉挂鶴而煙霏哉。假令子厚來此。必悔其目嘉名錫彼穢區也。

增紫氣山詩

淙淙流水隔橋聞。靜坐蒼苔鬱翠雲。陽雀夜啼千嶂月。簷勞閒鑿一溪雲。曾傳白雪飛初地。有寺名瑞雪禪林。詎有青牛立夕曛。幽境獨憐臨驛路。馳煙誰勒草堂文。

增衍齋苦熱詩

皓汗風光侶壽麻。無能清暑效浮瓜。金丸我欲彈鷓鴣。好植瓊南孔雀花。

游東山記

出玉屏東門。循山麓而行。石磴盤曲。路才容軌。牛叩馬搏。視此郁夷。方里許。延緣於田畔。時新雨初霽。畦水漲汎。秧苗抽鍼。平綠如鬪。穀犬亂吠。殊足喜人。再進。則一徑雲深。層松攢柏。列若夾道。松柯隱景。交蔭脩篁。清籟鳴條。山壑答響。雅可游目。憑檢。悟衷散賞。山之右爲寺。正殿倚巖。結構雖未宏麗。而真容巨壯。亦稱雄刹。兩廂有樓。可眺遠。下則游人憩息之所。旁穿小徑。蒔菽雜花。有洋繡毬二株。爛如雲錦。薄午鬱蒸。予倦甚。沈睡多時。起呼釭。則積陽已栖岫矣。出山門。振袂延風。神志爲豁。牛下遠邨。炊煙在樹。歸飛之鳥。千翼競來。俯瞰大江。回縈如帶。視往來征帆。不啻鳧雁也。

重游東山記

今夏三月杪。余曾策杖來游。茲以巡稼之隙。復問塗焉。時金風初扇。而餘暑猶勺藥。乃於林際。跌坐散髮。跣足松濤。竹響清若竽笙。舉頭一笑。宛喝都消。俄王尉聞予游。亦來相與踞盤陀。翫羶靡。聽鳴禽之上下。俛視遠水空明。皓同積雪。叩瞻白雲。翹然天外。容裔如如。而蓮峯北聳。疊椒重壑。刻露清秀。恍覺舊游無幾。而風景頓殊。猶然塵鞅。儼山靈騰笑我也。乃朗唼曰。青林倦鳥語。緜蠻侶說白雲返故山。日月幾何風景換。鏡中疑我尙朱顏。蓋予是時有退志矣。遂循苾迆至寺後。見碩木森井。圍繞沈池。激渟鏡澈。浮萍含

綠微颺乍拂。漪漣生文。蓄金魚二三百尾。曦景斜注。則相聚响風。蔞爲戲。又或衝藻徑去。游閒遠放。若避世士然。低徊者久之。乃昇王尉聯騎歸。回視嶮嶮。如攢圖之托霄上矣。

飛鳳山

昔向長欲男女婚嫁畢。裹糧游五岳。是其勝賞神鄉。秀情超拔矣。余疇昔亦心栖白雲。邈想霞蹤。今遠宦來黔。始入界。所遇巖巒。殊無慰藉者。舊說天下山半在黔。中青疑昔人譌詞也。臬抵任。暇事稍暇。凡境內山川。亦每觸岫延賞。傾瀾懷煙。而人士多嘖嘖飛鳳山之奇。其言曰。山之高。森峯限日。峭壁爭霞。俛瞰城郭。猶匹帛之繞叢花。險逾縣度。累梯乃升。下則壑難。河清流見底。游鱗可數。沙如霜雪。石似搏拊。架木爲略。約通之。蘭茝被徑。送馥懷芬。榜曰眾香國。高僧某卓錫時之所顏也。玉皇閣倚雲結構。渺如仙居。梵響凌虛。遠山相答。轉側十餘武。丹崖翠嶂。點黛飛瓊。石罅中灑布激素。灑清如委幅練。數折入河。聲猶雷轉。循崖東而左。仄徑難登。蟻亦須翼。攀蘿尋葛。乃躋絕巔。其上真花不落。古樹恆春。岫挂松欒。岑交竹影。流風叩阿。宛若彈絲。自下望之。澹冶如笑。蒼翠如滴。明淨如紺。慘淡如睡。四時之景。豁目頤懷。又風胎雨。霰戲弄羽毛。飛猱栖狸。乘煙歌唼。信可目韜軼笙簧。跨躡管籥。予耳之神思飛越。覺西麻玉筍。恍遇目前。急欲遯游。目盪吾胸。會差至不果。輒形膠寐。後勘地丙谿。途次壑雞坪。去山里許。見層巒疊嶂中。一峯高聳。旁有兩山夾拱。如鳳舒翼。憬此山之得名不誣也。爾時船雲彭鼻。陵雨潰流。路淖而溍。又不得往。游目探勝。恍如海上神山。可望而不可卽。然予有濟勝具。俟秋高。騰涼餘歛稍退。終當凌最高峯。造幽峻。看博

芙蓉之石調鶴拒格之松聆風泉之虛韻翫巖桂之清香不使子平獨精物隱也聊記此言目爲券

### 游白雲山記

廣順州東四十里有白雲山。層巒疊嶂。如渴驥奔泉。至此而止。白雲齋。峰頂陰晴皆見。爲建文帝荒遯之所。上有羅永蒼。蒼莽古杉三株。長數丈。其一經帝手摩。至梢無坳枝。又有跪井。舊無水。龍神爲之涌波。恆雨不溢。恆陽不涸。時有雙鯉出沒其間。取水者必跪汲。乃可得云。余於癸亥之二月。攝篆斯州。暇日命駕徃游。欲向寒煙蔓草間。卓錫之遺蹤。至則鹿苑積廡。濫泉息脈。林雅空噪。巖磬無聲。惟嶺上白雲。尙依依似舊也。道旁臥一石碣。鐫帝詩三首。係州牧韓之屏所刻。其中牢落西南一詩。作於滇南。後二詩作於羅永者。彙刻於此。則韓君之疏也。余旣剔薜讀之。遂策馬歸。歸塗少轉。有蒼嶺橫互。挾雲欲飛。懸崖青石。如婦人回首顧盼。簪髻宛肖。相傳有神嫗。每夜至帝所服役。後被人覩。歛化爲石。又有沈潭。融淳瀟灑。涵碧無波。相傳帝昔經此。忽一靈犀躍出。陞伏道左。若聽驅策者。噫。鳥翼庚辰。虎乳鬪斑。金狄洒淚。泥馬騰波。蛇衛顛頊之墓。燕填臨江之壙。神獻管涔之劍。龍眷寄奴之藥。推詳選迹。則影徹經史。考驗眞怪。則叶符圖籍。雖詞趣涉誕。而音旨非誣矣。旣作此記。復繫之目詩。

何年脂帝構。曾駐玉皇蹤。鐵匣歸天數。金川避賊鋒。驚心黃屋杳。滿目白雲封。草木挺旌節。袈裟換袞龍。虬供石洞米。鹿聆闍黎鐘。受詔犀分水。服勞嫗化峰。經途無白鳥。一宿河至今無直幹有青松。江海團瓢寄。關山程濟從。鶻唳篁竹裂。鶴唳瘴烟濃。我至尋遺跡。悲填萬古胸。

增建文帝君臣論

余嘗讀史至金川門失守。而王鉞言高皇帝有遺誡。既得鐵函鑲柙度牒剃刀。竊嘆槩弧箕箒。妖讖亡姬。高棘女瑤。天心割漢。似有定數。不可以人力爭。亦由聖祖不建青宮輔弼。俾作皇覺裔餘也。又念少康逃竄。終秉元圭。宣王潛閭。仍杖黃鉞。五年而天節反。一旅而中興奏。則忍辱圖存。乘機觀變。未始非識時之俊杰。撥亂之鴻才。方其成皇死沙場。昭帝居瞭瘡。俺答鳴鏑。戈鋌鈍於邊關。高煦磨牙。蜂蠶伏於肘腋。國致孤注。人情狐疑。必不能長駕遠馭。皋牢萬里之外。而滇黔地險。沐氏兵彊。假令効勃蘇頓庭。威公泣血。目能發勇氣於仲禮。唱義聲於濟陽。濮軍出荆門。卽襄鄧可搖。戈船下漢南。卽長江可據。奮青邱之神劍。返紫宮於彝庚。仁壽之鏡重明。雲臺之仗復設。握符闡珍。當不其難。或者謂夏桀浮舟。是爲失位。夷吾返國。終辱先君。故文叔受符。不慕成帝復生。元聖西歸。苦讓忠王繼統也。豈知惠王居櫟。殺子積而返都。襄王居鄭。誅太叔以奠位。伯者克正其難。春秋不目爲非。況未虐謗人。翻同流寇。未警蛾賊。竟爾蒙塵。反謂三靈改卜。九廟弛縣。豈熏丹穴。目求故君。忠乃不足。閉沙邱而餓主父。事固有名。昇無如斷鼈難期。荒野永遞。嘯痕浸淫於枕席。黃屋寄寓於團瓢。不知晉鄭之依。疇爲共和之計。黃圖赤縣。置之罔論。毋亦諒精衛不能塞海。愚公不能移山。遂甘心於瘴雨蠻烟。罔筮夫貞風熾火。哭連鸚鵡。寓公誰迎。謠應豆田。出帝不返。雖亡國大夫。不足昇言事。而千秋直史。何未書均房乎。昔者平囂降泚水。而容昇。杜宇禪開明。而遠放。要皆榮遺松棟。罔念萬國衣冠。塵視玉軀。何計三泉鳧雁。乃誦楞嚴。而白髮蕭蕭。敲梵磬。而天門蕩蕩。

聖人寶失。虛想早朝之雅。法王輪空。尙戀茶毗之骨。毋亦備嘗險阻。精力銷亡。魂將斷於祖龍。方思山鬼銜璧。運已去於佛狸。又恐帝祀實鹽。思歸葬西山。故明廷自列乎。至若痛哭之五十餘人。從亡之二十二士。沐雨櫛風。胼手胝足。四十餘年。忘其勞動。吟不動於龍蛇。走自効夫牛馬。雖無仁傑之偉烈。返金輪於廬陵。亦有子家之孤忠。奉馬鞍於堊井。所謂朱炎鑠石。不靡蕭邱之木。凝欠慘桌。不凋款冬之花。義悲六合。仁感萬禩。目視當日之輜。面授衣。開門延敵。昧衛難之洪義。拜殿下而主臣者。豈可同年語哉。

### 梵淨山

黔之郡凡十三。而山接蠶叢。江通雲夢。扼百蠻之要害者。目銅仁爲最。銅仁之山。凡數十。而巖谷幽異。峯巒峭別。壯三江七江。宙羅江。銅仁江。之形。執者。目梵淨山爲尤。玉屏昇銅密邇。余恨局於墨綬。不得躡。一問。辭支佛之遺蹤。然數數輒聞其奇。默想其景。髣髴其境界。不啻目擊之也。聞絕巔有寺。風厲不可瓦。冶目鐵。疑蜚廉爲之。歛炭。屏翳爲之。鼓爐也。寺側有崇臺三。曰拜佛。曰說法。曰煉丹。疑鴻衣羽裳。練精餌食之夫所宅也。有井曰定心。水寒沁肌骨。清鑒毛髮。疑飲之者可洗躁進之懷也。山後有池。曰九龍池。皎焉沖照。淨無斥草。疑有翠鳥銜其淪。擲也。登之者。先由金刀峽而上。峽之高千仞。中如斧劃。隔五六尺許。有飛橋相接。疑巨靈之所開鑿也。左右皆立梵字。廣闊可容數十人。陟者攀縲上下。若蹈空而行。疑上落雁峰。千尺之巔也。至其椒。千里風煙。可一覽而盡。疑登岱。宗日觀。可小天下也。然周圍僅四丈。突兀陡絕。疑損徒喪其捷巧。颺族謝其輕工也。又有香爐峯。綿絮巖。藏經巖。羅列競秀。下有九十九谿。紆折環繞。匡廬武旦之勝。

天台雁蕩之奇。亡目逾也。余於黔之錦巖珠壑。祕洞靈淵。亦幾遍踏矣。疑此山不獨銅仁之壯觀。且爲全黔之勝槩也。何必泛螺舟而渡海。乘毛車目翔風。登孽搖顛。羝于大荒。深踰次錢來于泰遠。然後詫語殊靈。朶標怪秀。目爲異乎。

游飛雲巖記

天官家言。周雲如輪。魯雲如馬。衛雲如犬。秦雲如行人。齊一作鄭雲如絳衣。宋雲如車。趙雲如牛。楚雲如日。韓雲如布。魏雲如鼠。越雲如龍。蜀雲如車。而不聞黔之雲爲何狀。余來黔。見毒箐灌莽。嵐溼之所。蒸鬱爲蠻雲。類符陽之怪氣。無所謂花葩。糾縵。錦繡。縹緲。縣垂。曜藻。慶喬。網縕者。乃至黃平。游月潭寺。顧瞻巖石。則爽然失愕。然驚且憲。憲然目不周覽也。則見奇執。闕詭不可名狀。或最屬而彭薄。或輪困而屈鬚。或遼巢而蒼鬱。或逆豎而倒縣。或龍鱗而虎辰。或鵬奮而鳳軒。或蛟騰而鵠逸。或獅厲而象狂。或麤引而旗導。或纓綴而帶翩。或乳坐而煙結。或浪擁而濤漩。而且高者礙日。下者回嵐。巨者勺谷。空者隱潭。皺者膚蹙。漏者竅含。瘦者骨削。薄者殼三。墜者星落。簇者毛毳。立者如暎。欹者如嬉。蹲者如怒。斷者如虧。竊嘆曰。此巖之石。何其譎也。何其似雲之欲飛去也。雖然。造化之工之奇。能目黔之荒僻。而闢此靈巖。復能使磊磊之石。變態而不可究詰。卒不能使雲之東西絡繹。南北油裔者。如此巖石。殆此巖已罄造化之巧。彼蒼無復餘情。目付豐隆。故此巖遂得獨擅飛雲之奇也夫。

坳飛雲洞詩



幾年仗劍尋龍子。執意飛來石洞潛。噓氣成雲作霖雨。竄身僻陋亦何嫌。相傳洞內有神。龍大雨時聞出。  
華不雁蕩醫巫閭。似此靈巖總不如。齒冷客兒誇木屐。那知天外步雲車。

### 游黔靈山記

古城李孝廉芬逸曠士也。余引疾閒居。日偕游雪厓洞。因爲余譚黔靈山之勝。約共遠游。旋孝廉返鄉去。不果。時屆初秋。炎都褰埃。旻寓滌氛。遂乘輿步出陸廣門。石逕紆曲。形似書字。寒谿沙衍。靜無漚漚。遠樹空碧。哀蟬激響。恍助予之鄉思。約行三里。衆山回抱中。露出羊腸一綫。盤旋直上。若鳥犴霄。天風振枝。足履波濤。仰眎蔚藍天。蒼蒼如石壁。泊造巔。則阿平開朗。四徹中繩。若未始有山者。修篁萬个。蒼翳成林。曦暉側注。金影瓌碎。延佇凝睇。青甯蠕動。綠痕上衣裾。苾芻出。邀入淨室。茶飲少憩。由正殿側右至一院。斜峯入牖。曲沼環堂。樹響飛嚶。階叢花藥。則游人匡坐之所也。壁多題時官詩。獨鄂西林相國近體二章。契予心。據石和之。擲筆舍去。抵寺後。見攢木千章。圍繞如幄。長卿緣坡而舒翠。荀子埒枝而凝紅。蒲錯振羽於草根。媚蚪引嘯於林杪。扶老之禽。昇梵唄相答。石竇之水。共松濤偕鳴。余亦乍覺其秋色之上眉也。裴衰者久之。日已入蒼林。埜烟漠漠。微辨來時路。望見明月。宛宛如故人。偕游者予弟淑也。

### 埒追和鄂文端公詩

烏紗新脫却。擲杖問仙靈。袖攬嶺雲白。眼爭山骨青。銜鐘林表度。馴鹿苑舟經。寺僧養默念銅文頌。商飜入廣庭。與子二

一泓鳴玉筑。萬綠聳金莖。似此山如買。當爲智者營。聽濤松蓋偃。顧影月波傾。俛仰九霄闊。軒渠鵝籠生。

附元詩

弓衣馳小隊。紆逕入黔靈。隔岸竹林紫。舉頭天骨青。芻尼馴上座。梵貝理殘經。問訊峨眉老。獐獠認祖庭。

主僧西川人。  
主曹溪派。

剎那車三窅。莊嚴草一莖。衆人殊狗苟。吾道亦蠅營。活殺從渠會。泥沙迴自傾。底緣返初服。安養證無生。

游牟珠洞記

牟珠洞在貴定縣西十餘里。洞內有羅漢大士石像。皆天生自然。妙麗莊嚴。石筍一株。竦削鮮潤。青如瑤簫。余壬戌至黔。徑來且蘭。數過其處。乃呼道士黉炬深入。則見石乳結撰。嵌空瓊瑤。闢閭廓豁。天開別境。雲謠波詭。莫可名狀。有若象者。隄足而蹙蹏。有若龍者。攫爪而蠅蟻。有若虎者。磨牙而趨趨。有若豹者。皎舌而捫撥。跪者若羊。眠者若牛。逸者若馬。藉草而伏者。若禺獠。負厓而犇者。若麋鹿。又有十丈蓮花。亭亭扶筵。翠色欲滴。如仙掌之金莖也。藕船類屋。橫亙天漢。波濤齋森。如博望之星查也。石梁聳峙。如彩虹跨臥。上有僊官。鶴氅羽衣。童子持幢。指導也。又有樓觀宮闕。結構奇猷。如入建章之宮。而千門萬戶也。如造閩風之巔。而銅柱瑤棟也。如游蓬萊。方壺圓嶠。三山而羽人出沒其閒也。有石鐘焉。蒲牢生動。蠡文齧缺。叩之如木。勝周景王之無射也。有石鼓焉。擊之則軒乎鑿乎。如奏鈞天廣樂。其聲動心。無需蜀郡之桐魚也。道士撥火指地上曰。此梅花也。眎之瓣葉鮮妍。皎瑩如玉。疑天女之所散。釋迦之所拈也。忽有聲自中。

來泠泠然似琴。夏夏然似筑。琮琤然似敲玉。嫋嫋然似彈絲。復杳杳然似湘靈之鼓瑟。羸女之歛簫也。頃之。碎狀如雷霆轟山。割狀如巨鷲劈岳。濔狀如康回觸不周。其澎湃振盪。如天風海濤狀。其凌厲呼号。軒天蹠地。如昆陽之戰。猛獸助怒。屋瓦皆飛狀。余方愕眙驚詫。莫知其所目狀。道士則曳余裾出洞。指澗間曰。向之聲不一聲者。水哉水哉。余曰狀。乃記之。

### 埵牟珠洞詩

洞內盛仙佛。瑤幢瓔珞垂華鬘。洞外森樹木。頻伽婆羅翊紫竹。落花滿地證般若。流水空山悟真如。來游兮。鐘鐘鼓鼓。仙佛額手紛告予。緊我方外之人兮。宜巖居。何事人閒金碧精吾廬。

### 鮎魚洞

洞在玉屏大江右。石壁百丈。中凹一洞。碧水珠迸。大如宮簾。產鮎魚焉。或曰。洞中一石。垂爲鮎形。故名也。案說文。鮎。鯢也。余正釋魚注。鮎。別名鯢。江東呼爲鯢。昔陳蔡之厄。作崇目昇季路搏者。卽此物也。夫鮎之爲言黏滑也。鮎魚似之。鮎兩目上陳。方頭腹。堅若囊身。微紫色。無鱗。一名人魚。其脂肪之不消耗。秦始皇常目其膏爲燭。又似鮠。鮠。偃額大首。長尾四足。一名孩兒魚。生谿澗。能上樹。含水上葉覆身。鳥來飲水。輒取之。王會篇。穢人。瘠兒。卽鮠也。余正。鮠大者謂之鰕也。知鮎鮠之狀。鮎形如繪。毛傳說文。目。鮎爲鮎。目。鰕爲鮎。殊關於訓稽矣。周益公記宜興洞有四足鮎。宋乾道六年。行都北關有鮎魚。色黑。腹下出人。手於兩旁。各具五指。則鮎妖也。玉屏城西二十五里。又有鮎魚洞。產鮎肥美。

諸葛洞

偏橋北五十里許。有諸葛洞。一名甕蓬洞。武侯征南蠻經歷處也。洞中有怪物。狀如水象。遇時曾出爲祟。地勢緊湊。夾岸飛巖。望似染黛。上下距縣五六丈。巨石臨危。若墜復倚。濤涌波襄。瘦蛟跳舞。渾浩巽怒。響振積坻。濬流沈起。迄於下口。雖雞翹洪之險。亡目險也。舟至此遂止。冬月水熱稍緩。多人捧曳。可至偏橋。其上雜樹交蔭。罕見曦景。立泉飛流。千丈似布。湍激之音。奇爲壯。猛禽莫獸。哀鳴相和。亦饒埜花。丹葩綴谷。若紅雲秀。天籟煢飾巖。若銀燭眩目。觀者思難周賞。情乏圖狀矣。壬戌四月。余自貴筑返屏。禺中至施乘。汎舟經此。因涔醴水漲。白波如山。爾日又值大雨。鴻流尾輪。環濤激轉。桀石橫互。江中碇礮似屋。一葉輕舟。時時觸之。霆砮轟盪。日驚星覆。恍天吳爲之呶歛。奇相爲之颺躡也。然延颺飛湍。魄未之駭。後爲友人言之。輒咋舌去。

響琴峽

平越酉陽驛之東十里。攢峯刺漢。古樹蟠蚪。斷壁中分。隙如斧削。而碧流飛注。激電轟雷。其聲冷泠。狀清越目長。非箏谷之金絲。異篋浦之楊柳也。吉林德觀察隆榜石曰。響琴峽。蓋得其似矣。余系之目詩。雪浪琮琤響玉琴。空山寂莫誰求音。倏來風雨羣靈會。寫出成連海上心。

相見坡

吾鄉隴東之六盤山。森壁軼雲。竦巖造漢。寥籠虛岫。塞峩積岨。路若絕而復通。石將積而更綴。所謂宵窈

而曲。崩。施其高者。歲甲寅。經此。下車山麓。挽衣荷筴而上。後人見。笄人履底。笄人見後人之頂。如畫累重人矣。延緣拗折。臚明至禺中。乃躋絕巔。俯視人馬如蟻。行者憇者遠近。逶迤陣演。率然矣。復盤折而下。石磴苔滑。樹杪雲橫。深壑小語。高峯如響。風息畏佳。峻逾邾邛。然籐交筍秀。澗響泉飛。瀏覽忘飭。今至相見坡。靡迤陂陀。下屬深渚。巘岈巘嶙。上虧日月。極天之阻。實在於斯。是目行者望風謝路。而異嶺共雲。別峯同雨。恍如盤山之在我前。田山蓋云。陟首坡則尾坡見。陟尾坡回矚則首坡見。立中坡而望則首尾俱見。起伏偃仰。石垂烟接。方沈澗心。突凌峯頂。行者此目手招。彼目口呼。送轍答於咫尺。而不知三十里之遙也。形容可謂逼肖矣。余也有客兒之豪情。江山助興。無柳州之嘉藻。林澗貽羞。聊綴長歌。目常游記。

上坡面在山。下坡山在面。相見令人愁。不如不相見。昔誦吳江施武詩。令我胸顛心滋疑。今年奉檄羅施國。陟坡正值芳春時。春雨霏霏泥滑滑。輿夫邪許肩爲疲。一步一顧上高嶺。遙遙樹杪人團影。須臾不見循幽坑。呼聲宛如在深井。斜飛瀑布巖坐簾。亂綴雜花莖照熨。批頰側翼桂之樹。清緩舒嘯河之塵。黃犢哀鳴鷓鴣叫。下輿四望風颺颺。葛藤鉤衣足欲蹶。拍手嬉笑來蠻兒。椎頭鑷耳語警警。似說前面箐林高。我曾攀緝上仙掌。渺此九牛之一毛。裹攜白雲空眼界。碧雞金馬嗤王褒。下視行人相勞苦。肩瘡蹠血多。商賈青箬圓。裹夔州鹽。黑苗斜插谿子弩。颯颯楓林吼虓虎。山王祠前煙一縷。

附七律一首

九折千盤相見坡。農家茅屋結山阿。誰其云者飛黃鶴。若有人兮帶女蘿。邨酒柔情玉練語。蠻童拍手鳥

鹽歌商訛苗言放也搖笑愁犖角鳥路斜陽自古多。

聖泉

寰宇源泉何啻億選而効靈廣堪者殆難更僕數。目予稽職方所載奇詭尤著者如滄州之澄綠泉。泛金石不沈也。允街之泉水。交旋如盤龍。攪之亦成龍狀也。廣陽之妒女泉。婦人炫服靚粧。必與雨雹也。霍山廟之泉。鼓動則流聲絕。則竭也。江乘之湯泉。半冷半溫。共出一壑也。多喜山之雄雌泉。春夏左盈右竭。秋冬右竭左盈也。安豐之咄泉。大叫則大涌。小叫則小涌。咄之則涌益甚也。是皆別具橐籥。壯坤輿之觀。不  
僅飲石上寒蟻。娛雲邊堊客已也。而要目黔之聖泉。可驗潮汐。爲尤足異。夫漳浦蠟潮。侯官潮泉。鐘山應潮。連州潮泉。固亦消息有時矣。然彼則地瀕海隅。緣海爲潮汐。而於泉無與。又若嬌亭石穴池陽湖泉。章貢三潮。安寧海眼。連州斟溪。樂平鳳游。荊門蒙泉。郴州潮泉。青城潮泉。龍場驛潮井。去海愈絕。似與此泉爲伍。第彼之潮候。僅再至三至。亦未有百盈百竭不爽晝夜。如此泉者。王韶之始興記云。貴州有漏洩。一日百盈百涸。應漏刻。殆指此也。余曾再履其地。見一泓自石罅迸出。噴若玉寶。泄爲瑤池。淨若醍醐。瑩成琉璃。試目錢置石上。卽潮涌而與錢齊。不湮不淺。則信乎此泉之得擅聖名也。宜其橫竹引之。調符取之。目獨痼滌塵。珍於玉酒瓊漿可也。奈人之飲狂掬貪。或且漱盜而去。此若浼者。亦獨何哉。

附楊慎聖泉詩

龍圖天生水。羲晝山出泉。曉茲聲沸流。肇自混沌年。盈涸在頃刻。消息同坤乾。塵刹變潮汐。億劫無買遷。

帝臺盎漿下神漢壺嶺巔冰雪姑射質風露綽約仙竇雲騰瀟瀟泓月涵涓涓鰕須穿皎鏡蟹眼瞭淪漣  
岷觴衍游望坳舟喻思予迷蹤鬼方霧蘊真羅甸烟詎逢陸羽品那遇桑欽傳名公紆勝引嘉招陶芳筵  
折簡開蒼蔚飛觥延霽天玉珂鳴重轡金艾明華田碧激灑柔翰翠微鑒洞絃臨淵稱混混倚谷望瑤瑤  
麗闐磬鼓動回谿蕢燭狀荒塗欣長會興言遂成篇





# 續黔書卷之五

多雨

史記正義引太康地記云。河北得水爲河。塞外得水爲海。自小而大之也。楊用脩云。黔人謂雨爲清露。自多而少之也。余辛卯之嘉平月。入黔境。卽霪霖。自玉屏至貴陽。凡十程。僅得一日晴。故有漏天之號。山海經曰。應龍已殺蚩尤。又殺夸父。乃去南方處之。故南方多雨。郭氏注。龍水物。目類相感。余竊謂牂柯分野。上當天井。是多雨潦。非必如隕歎之所云也。

埵愁霖賦

蘇利回。騁焦明舞翅。蜡爾雲垂。孖流霧織。苦雨連旬。陽烏引避。人不堪憂。天何徑醉。中庭桴渡。炊竈煙霾。昔耶上壁。旌遇翔階。百塵泥滑。千井醴排。門無繫馬。戶絕吟鞋。茹愁獨臥。散漫傷懷。若夫關山。縣互久理。征鞭雞聲。店裏人影。橋邊寒飈。震蕩怪鳥盤。鷲衣沾骨冷。髮沐涕縣。沈陰斷地。積水連天。長塗躑躅。故國茫然。別有儒生御旅。詞客郵亭。短垣傾圮。敗瓦飄零。囊無長物。案有餘螢。檢書泣鶴。讀曲淋鈴。草元寂寂。梧坐冥冥。裹糧無友。飽德自馨。於是石泐花蘂。林於葉結。澗浴青豨。浪浮赤鼈。鳩婦不來。桐魚宜截。后土難乾。屏号尙泄。假蓋誰憐。墊巾可折。三日佳晴。諺云。天無三日晴也。云胡不悅。爲之歎曰。銅鼓山崩。崩。蓬水漩漫。八番秧苗爛。六額蠟幫翻。牛肩拭泥血。龜鼻解銅環。求幣從此去。爲我洗愁顏。借得穆王笛。吹徹此荒蠻。

歧舌

呂氏春秋功名篇云。反舌。殊俗之國。高誘注。一說南方有反舌國。舌本在前。末倒向喉。其語與中國語相反。因謂之反舌。淮南子墜形訓云。東南有反舌民。高誘注。語不可知而自相曉。海內南經有歧舌國。藝文類聚引作反舌國。其人反舌。平覽云。軒渠之國。其人四舌而三腫。通考謂之三重國。拾遺記云。因霄之國。人舌尖處倒向喉內。亦曰兩舌重沓。金筑。苗狝之巢穴。余代庖之日。苗有訴牒者。令伸舌視之。宛如王子年所說。蓋舌主心。苗火旺。於己巳爲蛇。故蛇歧舌。南方歧舌之民。其亦火旺之象也。

醫方刻石

宋陳堯叟爲廣南西路轉運使。嶺南風俗。病者必禱神。不服藥。堯叟有集驗方百本。刻石貴州驛舍。地方賴之。余壬戌至黔。遇道旁殘碣。必剔蘚尋之。無有也。大抵年代塵邈。非風雨剝蝕。卽沈霾蔓草。否則爲牧童敲火。牛礪角。目致毀湮耳。

石刻

修文縣二里龍岡山。鐫陽明玩易窩五字。洞口鐫陽明小洞四字。王文成貶戫時講學之地也。都勻城北有石壁。鐫仁智之情。動靜之理。棲此盤谷。飲此泉水十六字。張鶴樓遣戍是邦。誅茅讀書。題此目自慰也。黔西州北六十里。有方石。厚闊各尺許。長二尺。默擡卽起。語則多人不能動。上鐫天合二字。都指揮馬驥之遺跡也。貴陽東山翠巘。崔嵬琳宮。縹緲鐫君山讀書處五字。郡人楊大賓習業之所也。安平之噴珠泉。

鼓掌喧嘩珠璣迸出鑄喜客泉三字參政焦希程之所題也永從之石芝洞鑄石芝洞天四字副使徐九皋之所題也又皮林洞有皮林山一名過化山參將鄧子龍題過化二字寨民相傳歲月石灰填之否則多病目也龍里縣南之留雲洞奇石怪壁巡撫郭子章題之曰雕雲也餘慶有古洞白雲封洞口則兩立至邑令韓任甫題之曰慈雲也龍泉北三里岩上刻天河洗甲四字劉綎平播凱旋經此勒岩也麻哈江之橋萬鏡建屢爲水沒三建乃成糜金巨萬總督張鶴鳴龔碑題萬鏡橋三字也安南縣文廟旁有石方廣數丈總兵鄧子龍鑄欲飛二大字於上畫寬尺許也又縣南雅關下有飲馬泉傳漢將軍關索至此人馬渴甚泉忽湧出成池參政林喬勒碑池左曰甘泉聖跡也國朝總督蔡毓榮勅且以飲人四字桐梓之葫蘆洞清幽深遠石狀龍蟠邑令萬侯建額曰天外賞大學士王應熊有北顧岩三字俱鑄於洞口也永寧之觀音洞有白石如甕鑄神龜玉液四字也天柱之千佛鐘鼓洞微霧濛濛清流潏潏邑令朱梓題石曰天下第一奇洞也婺川之蟠龍洞壁鑄蟠龍化雨四字也銅仁之東山突兀奇峭俯瞰大江絕壁鑄雲彩江聲四大字也都勻之夢迺山有碑鑄仙人張三丰觀瀾處八字也平越城西五里崑上有張三丰遺影郭子章於高處鑄神畱宇宙四字也遵義城北三十里石壁上鑄十二字云山齒齒水瀾瀾白飛霞曾到此也凡此石未駁落字畫可辨皆明人之遺跡也至遵義之白縣堡鑄石曰如能順從則世享福壽宋忠烈公楊燦曰十訓刻石示子者也龍泉縣東五十里有山高數十丈上刻仙羊巖二字相傳唐人之書也又夜郎崑刻夜郎古甸四字相傳李白經此所題也若鎮遠之香爐巖畔刻泝流光三字相傳爲漢忠武侯所題疑未能

信也。又永寧之留節洞。石乳凝結。上有字如蝌蚪。不能識也。永從之碑。摸高數十丈。上有仙督紅字。又仙嶠數處。皆有大篆。嘉靖時西陽司來侵地。募人鏟去也。畢節城北一百二十里。有碑相傳武侯所立。文漫漶不可讀也。此皆余足跡所至。耳目所覩。記考之於地里。參之目聞。說信而有徵者也。其他奇巖峭壁。幽崖邃洞。或有祕響異蹤。余恨無鷗車。未之到也。狀書不能擬。岳碑文不能比。嶧山猶筆之赫蹏。不忍棄者。志余黔中之所得。僅此也。

俗字

黔南各郡民苗訟牒中多俗字。亦有字書所載而音迥不類者。詢之。亦有解。如鈔讀爲卞。言措勒不與也。穿讀爲擺。言行止動搖也。嬰讀爲戀。言婦女善淫也。又覲讀爲紐。言目蟲置火上狀紐動也。集韻。覲。遠。貝切。音。權。蟲。入。火。情。讀。爲。刁。言。人。形。短。矮。也。廣。韻。有。爲。字。音。爵。與。雀。同。說。文。爲。依。人。小。鳥。也。卞。讀。爲。絡。言。明。晦。之。斜。側。者。也。集。韻。卞。音。塊。塊。也。淮。非。一。卞。塞。江。又。普。木。切。音。文。義。亦。同。孛。讀。爲。鴉。言。水。之。分。流。者。也。孛。廣。韻。集。韻。類。篇。並。音。滋。玉。篇。云。雙。生。子。也。黔。之。古。城。南。有。孛。江。車。浴。兩。水。將。合。處。形。如。入。字。有。寨。焉。亦。名。曰。八。孛。

川字

黔之人呼牛馬之竅爲春。余莫知其解。或又曰穿。思之知當爲川。始信土俗方言。果符訓詁之指歸也。案山海北山經。倫山有獸。狀如麋。其川在尾上。其名曰熊九。郭注云。川。竅也。而姚旅露書引山海經。川作穿。蓋穿可訓川。故釋名曰。川。穿也。顏師古漢書李尋傳注云。川者。水貫穿而流通也。裴氏廣州記云。南海龍川縣。本博羅縣之東海。有龍穿地而出。卽穴流東泉。因目爲号。是川之訓穿。傳記多有之。又伯樂相馬經。

有馬白州亦當是川字畢中丞沅山海經校本疑川當爲州蓋据余正之白州驢不知郭氏彼注亦目爲竅則州爲後人譌寫無疑也張揖廣雅亦云川譬也可證

### 釐字

黔之人儕輩相呼其偶不往赴則唉曰釐質問之則釐者不來也案古釐字本有來音劉向引詩來牟作釐麤郭顯卿字指釐字从釐徐仙民讀與來同鄭康成儀禮注曰狸之言不來也徐廣云狸一名不來天子設狸侯所以射諸侯之不來者取此意也是黔人之言不來爲釐獨狸名不來爲反切之音如并夾爲繡終葵爲椎邾婁爲鄒勃鞞爲披舉矩爲莒勃蘇爲肯壽夢爲稟舌職爲殖顓孫爲申蒺藜爲茨茅蒐爲靺扶胥爲輔於菟爲虎不聿爲筆軒轅爲韓俠累爲傀瓠盧爲壺鞠躬爲芎丁寧爲鉦僻倪爲陴和同爲降句瀆爲穀明旌爲銘大祭爲禘殯蕪爲須于居爲邾窓籠爲聰蠅螭爲鳩瘕蠹爲疾蔽膝爲鞞側理爲紙扶淇爲澹狻猊爲獅不可爲叵奈何爲那何莫爲盍者與爲諸之焉爲旃徒格爲斥如是爲爾之類皆目雙聲合爲一字其學起於涿郡高誘其注呂氏春秋淮南子往往詳其音讀而韋宏嗣注國語亦有音切今人相承目爲始樂安孫叔然者誤也

### 生六男

癸亥二月余在會城一日晨集公廡同僚有言黔西某里王氏一胎震六男者子母皆無恙或目爲駭余曰此固黔之已事也昔陸終氏娶鬼方女嬭音劓人表作女嬭故集韻音大職作女嬭一作女嬭誤久孕不育啓左脇三人出焉啓

右脇三人出焉。譙周輩咸目爲誕。目今況古。知記注者不妄也。而又何怪焉。曾聞苻朝遵義天旺落六寨。士女酥卽孿產牝牡而獸尾。衆目爲女與畜交。故有此。三度關守者白之總督馮岳。將訊之。岳曰。蠻族本穴居巢臥。人獸相雜。卽此盤瓠馬人之故習也。遂令壞所產而置女不問。

化虎

括地志。越徑之人。老者化爲虎。博物志。江陵之羆一作猛。人能化虎。好著葛衣。天中記。雲南蠻人呼虎爲羅。羅人老則化虎。有羅藏山。今黔之夷俗亦善變虎。王漁洋記定番土司事非妄也。土人言此事多有。其子孫入山頗識之。虎亦數逞其家。巡視余竊怪焉。夫齊姜化螟螳而吟。帝嬪化蒼草而媚。宓女填海爲精衛。嫦娥奔月爲蟾蜍。是皆幽思煩冤。鬱遏莫發。化爲異物。憤憤鳴情。若伯熙之爲黃能。如意之爲蒼狗。黃母之爲大鼃。杜宇之爲鶯周。仲明之爲王鮪。殆又所謂強魂敲圍淪化。俶誕者矣。乃孟食裳襲而忽斑其皮。鋸其牙。虓其聲。是漆齒鑠耳之倫。皆牛哀與李耳也。鬚首渠股之類。咸左飛與封雍一作邵也。不必見蛇。始目爲杜預。不必見蟹。始目爲彭越。人之化也。小大無優劣。善惡無常體。書佐鈴下。且見之爻象矣。儻淮南子所謂志與心變。神與形化者矣。蓋猶是廩君務相之餘風也。或曰。蠻人有術。能使人化爲虎。受此法者。目三尺布巾。數升米糗。一赤雄雞。一斗酒。又聞穹能爲變鬼法。或男子。或婦人。變形作羊豕驢羸之屬。齧人至死。吮其血咽之。土官重其法。禁不能止。或捕得輒生瘞之。名曰鬼方。良目是夫。

呪尸爲魚

西南國風土記云。刑備有卜思鬼者。婦人習之夜化爲猫。犬遇病者。攝其肉唾水中。化爲魚。鰓取而食之。今黔南諸苗。能目術。呪尸爲魚而食之。亦此術也。又有苗手持蛇啗之。采樵歸。捕蛇滿籠中。蛇亦不能去。儻卽西京賦所謂水人弄蛇者與。聞雲南迤西南牙人。婦人怪者。或化異物。富家化牛馬。貧家化猫狗。至夜伺夫寐。目短木置夫懷中。夫不能覺。卽化去。攝魂魄至死。食其肉。有守者逐得。則夫家亟出金往贖。否則殺之。又猛密人工幻術。能易人心腎手足致死。卽牛馬亦然。

### 石棺

玉屏縣志云。玉屏城西北。隆萬閒。欽天監奏其地當產草寇。遣使七晝夜。猝至掘之。石棺蓋半啓。其人一手握髮。一足踏棺。執將躍出。急目銅釘釘之。乃斃。聞初葬時。係木棺也。此與汪喬年發闖賊祖墓內有金蛇鐵鏡事相類。余考唐中和三年六月三日。太白山人謁金州刺史檢校尚書左僕射兼御史大夫崔堯封曰。本州直北牛山。旁有黃巢谷金桶水。今大寇之帥黃巢。盜據上京。近已六年。又僞國大齊。号金統。慮王氣必在此山。伏請奏聞蜀京。發卒破掘。則渠賊將敗。堯封遂與州官點諸縣丁男萬掘之。月餘。山後崖崩數丈。有一石桶。桶深三尺。中有一黃腰獸。旁置鹿盧劍長三尺。黃腰見之。呦然數聲。自撲而死。堯封奏聞。至秋黃巢果衰。中原剋平。此又與宋永嘉末吳猛殺建昌巨蛇而蜀賊杜弼卽滅事相同也。嗟乎。古今來巨慙大猾。皆山川之蓋氣。鍾之。安得迅霆宣威。巨靈鼓斧。摧深山之虎豹。殲大澤之龍蛇。目免斯民於塗炭哉。

人疴

龍里縣東門內短垣數堵。筆門前斜立一人。年約四十餘。衣甚須捷。面頰而容有蹙。左目修翹。右目內有肉釘挺出。長幾三寸。粗如小兒臂。充滿眼眶。有橫痕略似麋目形。而肉色殷紅。余於壬戌十月初四日過見之。爾時細雨溟沐。其人負磨猶張目而睨眦也。噫。異哉。儻卽所謂人疴者與。

風鬼

十洲記風生獸。似豹青色。狀如狸。在南海大林中。張網得之。燒之不死。斫之不入。鐵錐鍛其頭數千乃死。張其口向風。須臾仍活。以石上菖蒲塞其鼻。卽死。又謂風生獸。喜食蜘蛛。啖薰陸。以腦和菊花服至十斤。可長生。常持一杖。指飛走則不能去。人得之指物。所欲如意。診諸管說。卽廣州記之平猴。嶺南志之風母。抱朴子之狷掘。虞衡志之風狸也。又禽經風翔則風注云。風鳶類。越人謂之風伯。淮南子羿繳大風於青邱之野。許慎注。大風。鷲鳥也。異物志云。蟹之腹有風蟲。狀如木鼈子而小。色白。食之發風毒。是風獸。風鳥。風蟲。管有之矣。未聞有風鬼者。陸次雲洞谿織志云。風鬼出黔中。無形無影。目旋風攝人爲害。余至黔輒以此問人。咸云無有。不知是次雲謬言。抑管有而今無也。

鐘鬪

平越城南有高真觀。觀旁有洞。幽邃莫測。內有物若牛。時出見之。相傳明正德閒。忽一夜洞外雷吼。僧驚。起鐘。失鐘所在。有頃。閉鐘。一路負聲而來。譟震林木。詰朝。抵之。凡鑿鏡上下。甬紐左右。悉黏水草。乃



寤疇昔之夜鐘與牛鬪也。後覺之乃止。大凡物歷年久遠能爲神怪。水西之金雞。曠月查城之石虎。噬人石龍。騰甲而鼓吹。聳亦在桑木被斧而雷震至。在綏陽城西橋水中。悉有證驗。非同倣誕矣。

### 馬化石

貴定城南四十里。有白馬山。上有古池。深不可測。人迹罕至。至則風雨晦冥。相傳有白馬見於山下。一黃冠呪之。馬上山化爲石云。案水經注。蜻蛉縣有石豬。子母數千頭。傳言夷昔牧豬於此。一朝豬化爲石。後人遂不敢牧。然未聞有異人之迹也。茲黃冠者。毋亦饒初平叱石爲羊之術與。大抵神仙好遊戲。嚼飯成蜂也。飛履化鳧也。擲杖爲龍也。水喚紙驢。肩牽茅狗也。向井呼錢。於盤唾獺也。彈橘裏之棋。渡江中之扇也。是乃麻姑所謂狡獪變化也。

### 雷擊六人

考京房易傳云。雷電殺人。何雷天拒難折衝之臣也。君承用節度。則雷以節暴人。威福則雷電殺人。是則謝仙行火。巨楔走精。蒼旻之賞罰。所以補刑戮之所不及也。癸亥六月。余謝病閒居貴筑。有自玉屏來者。言月之初七。值趁虛日。鄉城懋易者。咸集南明樓下。時天晴霽無雲。忽迅雷大震。雷火自樓隙穿下。市人咸驚懼。霎時煙散。見六人仆地。竅血而死。樓柱失半。其旁買菜傭。誤殞旋蘇焉。稽神錄雷誤死者。後廉實其四人。常沃米目水。羸糝糠售之。其二人則習用銅鐵白錫諸假銀以誑人者。嗟乎。博陵血練。無雲而殞。叔卿剡胸。其警卒斃。展夸隱匿。死詎能寬。武乙虢橫。生未可道。在其人方謂碧翁之贖贖。而天卒殞之。

使不得售其術以有其身。然則世之俯張爲幻。倖王法之所不能及者。雖復服橐韋而佩嘉榮。食正過而挾半石。亦難免於辟歷之礮。其亦可以忧心矣。

# 續黔書卷之六

## 官鑄

黔中錢局二。設於貴陽大定。局事卽以知府領之。采辦滇銅。鼓鑄搭放兵餽。余初至黔。見市錢猶因好完具。厥後省局私鑄小錢。不可用。余上書署藩臺董觀橋前輩言之。其略曰。國家嚴私鑄之律者。所以防奸民也。今不聞奸民之盜磨取鎔。另起鑪竈。而峨峨守牧。行固阻僧。顯犯王章之所不赦。市塵之中。充然堆積者。無輪郭。無衾易。一千之貫。不滿五寸。比於鵝眼。縷環。同其薄劣。入水不沈。隨手破裂。斗米萬錢。指貨千錢。小民日用。難權子母。藏之不可爲泉。行之不可爲布。甚非所以愛養閭閻。通惠商旅也。昔高恭有言。私鑄薄濫。有司糾繩。絀網非一。以爲旣示之以深利。又隨之以重刑。尙非政體。矧殺雜爲巧。以期得贏。而逞邪奸者。卽官司也。彼小民亦旣聞之矣。而憲臺曾莫之問。以爲不知乎。則職居廉訪之謂何。以爲知之乎。知而不克糾。則人不疑錢之不通神。不可得矣。云云。旋司局某告病。坐擁巨萬。將入都爲貲郎也。

## 鹽

鹽曰鹹鹺。伊昔官立司鹽。縣設海鹽。其爲利博。而用亦宏矣。自然印成者石鹽也。溇淖未凍者鹽鹽也。其曰鹺者南裔鹽也。其呼鹵者蜀鹽也。其稱餘者越鹽也。其謂鹺者河內鹽也。其名鹵鹺者戎鹽也。其目渠展者齊鹽也。最下則并州之末鹽刮鹽也。其他爲白爲烏爲紫爲黃爲黑爲紅爲綠之異其色。爲苦爲飴。

爲散爲形爲寒石之別其味爲非爲印爲乳爲駁爲虎爲鳧爲巨枕作桃者誤爲水晶爲繖子爲馬齒之殊其狀正復繁賾難紀羹而調之盃而齎之自不患其齟齬是以鹽有澤于閩匯之鹽有池猗氏販之鹽有山夔峽掘之鹽有井九龍食之黔介滇蜀之中獨不產鹽惟印給於蜀來遠而價昂洗金之物與金爭價黔之民有不如西域之駝桂平之牛者矣儻卽伯益之經所紀無鹽之國與常璠南中志沮本有鹽井漢末無鹽也案沮卽且蘭三郡卽建寧牂牁平且夫鹽之生也不擇地或出於鹵或出於井或出於崖或出於石或出於木或出於泉或出於草黔水蹠涔耳自不能熬波出素而邃洞幽崖深林密箐固所饒也倘司事者精求牢盆之術廣募亭戶濬掘天藏而與民同味將地不愛寶靈慶志瑞醜之嚮之肴將溫給則蚩尤之血可漬於蠻鄉而蛤蜊之波可流於蠻洞彼夙沙瞿子豈得獨擅煮海之功哉

茶

黔之龍里東苗坡及貴定翁粟沖五柯樹擺耳諸處產茶而出婺川者名高樹茶蠻夷司鸚鵡谿出者名晏茶色味頗佳近俱不產大吏歲以爲問有司咸買他茶代餽之

論曰茶之名見於神農食經毛詩爾雅飲於漢魏盛於唐宋至今而錄而譜而經人人皆陸羽矣嗜之者以爲釋滯消壅厭之者以爲瘠氣耗精二者各執其說是猶邾莒小國不肯降心於齊魯大邦也雖然金甯珠藥玉濤素塵香含雪尺秀起雷車采之擷之收英斂華爲酪蒼頭代酒從事固足以滌煩清暑而不

知關設成俗虛糜泉刀而非徒斛瘳增熱侵肌爲害己也比見近歲上下競啜清欲霜華甘思露液乳煎

碧玉雪翻銀絲鼎鑪或煩於嬌女。旗槍至誤夫老兵。堦菊至翳桑之報。神仙祈甌犧之餘。似檜雨松風。醍醐遜味。窮春秋覽河圖。不如載茗一車也。而鄉鄙摩厲之夫。尤致羨於寶文初蕊。穆陀墜葉。往往賤售新穀。問西園之價。希北苑之珍。廣術曲閔。茶肆櫛比。飲者肩摩足屐。昕夕不絕。何異海上逐臭。里中效顰乎。而商旅懋遷。經山川之險。博錙銖之利。每以絲絹相易。不知凍水雕文之難。以爲蘇蘭新桂之娛。歲費百萬。仙靈莫通。苦口爲師。療饑無術。是以有用之物而易無用之物也。考金史泰和五年。光元二年。尙書省臣並奏禁之。自七品官以上。方許食茶。不得賣及餽獻。亦裕財足食之政也。今之畱心民事者。尙可踵而行之乎。

### 女酒

黔之苗育女數歲時。必大釀酒。既漉。候寒月陂池水竭。以泥密封罌瓶。瘞於陂中。至春漲水滿。亦復不發。俟女子歸日。因淺陂取之。以供賓客。味甘美不可常得。謂之女酒。又有窖酒。色紅碧可愛。余初至黔飲之。經日頭熱涔涔。後畏之如雲白鉤吻。問諸人。言此酒用胡蔓草汁漉也。周禮序官女酒三千。注女酒女奴曉酒者。

### 革器

案蒼頡七章。有鞞囊一篇。言治皮之事。今其書簡已逸。韋人職闕。不復見古人察革之道矣。乃滇迳鬼方。竟擅絕技。不知者疑以爲鬼工。言不能及也。有問於精手者。則告之曰。凡革鍛不擊則易蕤。治不約則易斷。不盡之水。摩其皴膜。則無以皴澤。不炙之火。舒其皴粟。則無以皴張。不轉以石。則文理無由細駁。不審

以土則鑽孔無由堅。罅反是而攻焉。而後削之。髹之。績畫之。厥爲鴟吞焉。可以注蘭生。厥爲螭盃焉。可以  
穠嘉味。以之爲棋局。雖無難腔之清韻。而滑膩足珍。以之爲馬鞮。雖無錦障之光華。而柔韌足翫。以及爲  
盃。爲壺。爲卮。舟。爲鈿盒。皆積緻可尙。不必鎬縣黎而鑄麟趾。不必雕沈檀而燒宣窯。列於市廛。黑如純漆。  
赤如鷄冠。黃如蒸棗。又或縹綠葱青。嫣紅油碧。羊之肝。鵝之血。蝶之粉。鹿蜀之五采。粲然滿目。雖邊鸞花  
鳥。雀蚓蟲魚。不是過矣。作鷹者膠穀楮爲之。飾以漆。敷以采。光澤華麗。猶夫革也。觸之浸之。不月而潰。退  
矣。膏者不察。擲青蚨與朱提。是殆以皮相也。

洞錦

錦之以花木名者。芙蓉也。蒲桃也。牡丹也。葵花也。蕤荷也。櫻桃也。茱萸也。林檎也。芝草也。阜木也。以鳥獸  
名者。對鳳也。翔鸞也。翻鴻也。仙鶴也。孔雀也。鴛鴦也。飛燕也。麒麟也。金雕也。天馬也。辟邪也。獅團也。象眼  
也。走龍也。蛟文也。龜背也。虎頭也。以器物名者。樓閣也。擣蒲也。綬帶也。銀鈎也。盤毬也。篋紋也。魚油也。博  
山也。連璧也。雜珠也。答暈也。方勝也。閨婆也。皆所謂愒五色而極思。藉羅紈以發想者矣。黎平之曹滴司  
出洞錦。以五色絨爲之。亦有花木禽獸各樣。精者甲他郡。涑之水不敗。漬之油不溢。是夜郎苗婦之手。可  
與堯時海人爭妙也。又有諸葛洞錦。出古州。皆紅黃緜紗所織。甚麤。不可用。

鐵笛布

永寧鎮寧二州出鐵笛布。其織美似蜀之黃潤。其精緻似吳之白越。其柔輒似波戈之香荃。其縝密似金

齒之縹疊。余不知其何以織也。或謂卽桐華布。績白桐爲之。或又謂緝桑爲之。如嶺南容州之用。句芒木。新會之用。鉤綠藤。高昌之用。婆羅樹。惜未問之。獐獠。又有紋布。可爲巾。定番苗婦所織。潔白如雪。拭水不濡。用彌年不漬垢膩。又有斜文布。名順水斑。蓋模取銅鼓文。以蠟刻板印布者。出獨山州爛土司。

### 金星硯

孔方平硯銘云。穀理綺文。金星玉質。以言墨海尙潤也。思州之架谿潭產石。有金銀點者。可琢爲硯。唐秀才源以一枚饋石色。旣未匹垂露。匠工復未能割雲。以之殺青草。易於損豪。雖注以婺川香墨之水。恐不能班采散色。漚潤菟翰也。嗟乎。石墨相著而黑。紙筆圖臨爲章。邪心讒言。無得污白。旨哉是論。惟磨不磷。涅不緇。屹然雅操之君子。方露圭角。非佔佔較評郎官樣。鳩鵲眼者所知也。

### 苗刀

苗人製刀。必經數十鍛。故銛銳無比。其試刀。嘗於路傍伺水牛過。一揮牛首落地。其牛尙行十許步。繼仆。蓋犀利之極。牛猝未覺也。爲之贊曰。劍能斬馬。鏃工殪虎。遯水蠻刀。刺牛委土。攜不畱手。猶然步武。切玉昆吾。臚布析縷。驕然銛鋒。無缺容乘。萬辟千灌。試可匪貯。

### 神黃豆

神黃豆。產黔之荔波。形如槐角子。眎常豆稍巨。服之可永除小兒痘毒。服法以每月初二十六爲期。半歲每服半粒。一歲每服一粒。一歲半每服一粒半。遞加至三歲。則終身不出痘矣。或曰案二十四氣服之。以

二十四粒爲度。先用笊瓦火焙。去其黑壳。碾作細末。白水下之。

鮮答

壬戌四月。余自貴筑返屏。宿偏橋之黃絲驛。逆旅主人馬受暑死。腹孕肉囊。剖眎。有物狀如雞子。色白。椎之甚堅。非骨非石。層疊周裹。多至升許。不知爲何。僕人以示余。余案本草有鮮答。生牛馬諸畜肝膽。此宜是矣。西域蒙古祈雨。以鮮答石浸水中咒之。輒有驗。其人亦名鮮答氣。鮮答在畜腎尤良。形如鸚武嘴者爲最。重大可如拳。或黃或白。生剖得者爲靈物。或言能治奇疾難名者。是又不止祈雨也。又聞牛有黃在膽。黃一名丑寶。馬有墨在腎。狗有寶在肺。鹿有璠在首。羊有脂石在腹。驢有媚在口。

燕麥

余正。薺。雀麥。郭注。雀麥。卽燕麥。有毛。案卽穆天子傳之莖麥。內經之迦師。郭義恭廣志之析草。孟康漢書注之斯禾。張華博物志之薺草也。楊升菴以江淮所進之烏味草當之。繆矣。羅鬼國禾米亦佳。土人以燕麥爲正糧。燕麥狀如麥。外皆糠糲。內有芥子一粒。色黃可食。羣苗以此爲麪。每人製一羊皮袋。盛數升。塗饑。輒就山澗調食。謂之香麪。其地賴此甚多。古語曰。兔絲燕麥。徒有其名。殊未然也。博物志謂人食燕麥。骨節斷解者亦妄。

羊肚菌

余正。中。馱。菌。郭璞云。江東名土菌曰馱。樹。孫炎云。地蕈亦曰地雞。又有獐頭。猴眼。雞墜。松蛾。桑鷲。楮雞。榆



肉等類。皆楠香而可食。黔之深箐邃洞。人跡罕至。往往爲苗獠所踞。采食山毛。古樹內多生羊肚大菌。潔白如雪。重或一二斤。食之。雖元都綺葱。碧海琅菜。千品甘露之饌。百花珍藥之菓。不是過也。余代庖古城日。苗人曾獻之。又有木薑實如胡椒。味辛可佐食。

### 降真香

名香多出古木。若鷓鴣斑生於木坎。迦南生於黑木。艾納生於栝松。奇藍一作男生於榕樹。安息生於辟邪樹。膽八生於木犀。篤耨生於真臘之杉木。金顏打魔迷迭薰陸返生之皆爲樹脂。又如蜜沈。棧雞骨黃。熟雞舌馬躡青桂八香。同出於一樹。黔之貴陽府境出降真香。燒之可感引鶴降。醮星辰宜焚之。凡宅舍怪異。疫癘刃傷。燒之立驗。小兒尤宜帶之。蓋此香在深林密箐。縣巖之古藤上。人跡不到。霜饜雪虐。經歷歲月。肉皮俱爛。赤心如鐵。故其香勁而遠也。以生於藤。又名紫藤香云。



# 續黔書卷之七

梓枌

黔中昔饒梓枌。播州更蕃。以桐梓名縣。猶酸棗之姓溝。豫章之氏郡也。近者槩伐濯濯。無能化牛矣。余至播。所見拱把數株。殊無巨抱者。案梓亦有數種。木理白者爲梓。赤者爲楸。似楸有角者名角梓。黃色無子者名柳楸。楸之小葉者爲榎。榎卽說文所云櫟也。梓之實。古今注云。豫章也。梓之桐皮梓實而美者爲椅。尸子謂荆有長松文椅是也。又有鼠梓。一名椳。詩云。北山有椳。卽此木也。又有虎梓。江東是植。史記貨殖傳。山居千章之材。徐廣云。材。漢書作菽。樂彥云。菽。梓木也。左傳伐雍門之菽。字又作櫟。晏子春秋。景公登箐室而望。見人有斲雍門之櫟者。卽菽也。梓亦作籽。尙書梓材。古文作籽材也。枌木其樹直上。若幢蓋之狀。葉似桑。子似杏。今作楠。爾雅以爲枌。

粗

貴陽鄧玉峯澗甲寅房師先生之居。花卉頗饒。有樹焉。秋時結實。較木瓜微大。摘味之。似梨而酢澀。或謂卽櫟。余案蓋粗也。夫粗。榎櫨也。李時珍曰。榎櫨乃木瓜之大者。櫨子乃木瓜之小者。榎梓則櫨類之生於北方者。三物與木瓜一類而實不同。詩之木李。通志略之榎櫨。埤雅之木梨。皆謂粗也。

邛竹

昔我家博望侯至大夏得安石榴蒟醬並得筇竹賈人言市之身毒國也身毒索隱音乾篤或曰賢豆亦曰天毒漢書作天竺逸周書作天竹杜篤傳作天筑或作天督通志略云天竺卽捐毒也田山薑以爲邛竹出蜀之臨邛謬矣夫黔之氏貴竹也以生筇竹也筇竹亦作桂竹零陵記所稱桂竹之莖座桂竹是也考山海經雲山竹譜引無草木有桂竹甚毒傷人必死竹譜云棘竹一名芳竹扶疎森然大者圍二尺可禦盜賊又交趾有策竹實中勁強有毒銳以刺虎中之則死皆桂竹之屬亦生筇竹劉逵注蜀都賦云筇竹出興古盤江以南卽山海經之扶竹也余至黔中經歷數郡凡遇叢薄幽鶻輒爲之拂升斤聽禽橄旁皇其下賞赤箸綠筒之修篁翫育蟲雲母之嫩籜狀未見梢雲百尋摩月千尺望之似甕剖之爲甑選之爲舩者毋亦土薄水淺霧重煙荒不能畜此礪礪之奇節乎其萋蒨高原夔逮重谷檀欒夾水櫛蟲圍塘青嵐連帶碧空掃煙浮筠之簞上葳蕤而防露嬋娟之篠下瀟瑟而來風予也吟句對青學仙服汁納千畝於胸中傲清貧之太守非得竹王之胎鬱爲茂林何以有此平安之報哉

重臺蓮

世閒花卉無踰扶藁者蓋諸花皆藉暄風飖日獨蓮花得意於水月其香清涼雖葉亦自馥也周濂谿比之君子曾端伯稱爲淨友洵不誣矣余至黔葺演池中產衣鉢蓮有赤白青三種卽梵書所謂頭波摩芬陀利優鉢羅也而玉屏署前後饒白蓮月白風清雅足幽賞癸亥之夏印江梁秋湄明府書來言衙中菡萏盛拆皆千葉三出凡六層房中攢出之花更切豔可人無慮數千朵雖太液之華萃銅池之望舒難以

方矣。其友人周唵虎有池中蓮詩寄余。

增周价池中蓮詩

山之盤兮中阿。芙蓉池兮水激波。待朝曦兮花明。襲高柳兮翠煙橫。午風初兮雲爛。含芳華兮尙舒以半。望美人兮不來前。獸裘裒兮碧漪漣。寂莫兮誰親。饒邨夫兮弗可與鄰。中惆悵兮難言。白萍飄兮若無根。有君子兮水之央。遠不可接兮顧瞻而襄羊。惠我兮光澤。尙無違兮我思積。思積兮情憐。怕聽聾兮夕陽。蟬蒼蒼兮莫色。欲晏兮恐難息。自今兮相期。永追隨兮切莫遺。

蘭

楚詞云。余旣滋蘭之九畹兮。又樹蕙之百畹。注。蘭爲都梁香。與澤蘭似。澤蘭又名虎蘭。譜云。春蘭葉細。夏蘭葉細而長。秋蘭葉大而澤。冬蘭葉差大。葉皆不凋。春蘭一榦一華。夏秋冬蘭皆一榦十數華。山蘭瘠而小。建蘭肥而大。丫蘭最貴。莖葉生歧枝也。廣志云。蕙草綠葉紫花。鄭樵曰。卽零陵香。葉可代香。非今之蘭審矣。後人不識蘭草。蘭花爲二種。遂以一榦一花者爲蘭。一榦數花者爲蕙。号曰蘭蕙。啓矣。黔雖荒微。亦有燕尾魚魷。披拂於長坂曲谿。樵者輒隨衆草刈之。以爲薪。余於馬鞍山在廣州采得六本。莖於庭前。開之甚醜。與朱子所謂葉無氣質。易萎弱者迥不同。乃眞王者香也。爲歌離騷一章。

循隱谷兮襄羊。聞幽蘭兮歎香。言采采兮紉蘭。芳菲菲兮彌章。攀紫莖兮擘綠葉。羌羅生兮山之壘。睇翠羽兮回翔。汎充風兮膏露接。忽反顧兮浩歎。公子去兮雲端。無同心兮當門忌。秋風敗之兮。余涕汎瀾。戶

服艾兮盈盞。曾不知靡蕪之清高。豈其未見兮九畹。實秉德之不昭。藐吾逕兮豁吾局。如游蘭澤兮登蘭亭。願芳馨以自愛兮長無絕此青青。

長壽草

廣順署後卽馬鞍山。古樹叢林。虬蟠雲結。而懸崖峭壁。尤饒奇草。鬱鬱葱葱。要皆神農磨曆之所未嘗。壯武博物之所未志也。暇日摳衣而上。柔茵綠鋪。敗人眉宇。爰藉之賞玩。見有葉舒如梅瓣者。圓莖脩枝。枝卽抽於葉心。枝各一花。花分五瓣。色深碧。中藥須猩紅。亭亭蓓秀。不與羣草伍。問之小隸。對曰。長壽草也。聳狀異之。夫員邱有不死之樹。食之延壽。郭景純游仙之所詠也。洛陽光明殿前有長生樹二株。晉華林園植長生樹二株。皆樹也。惟周髀算經言中衡左右。冬有不死之花。漢武時日支國獻活人草三莖。死者將草覆面卽活。又河圖玉版云。防風之二臣。以刃自貫其心而死。禹哀之。乃拔其刃。療以不死之草。是皆奧窟真宅。靈嶽名山。乃產此嘉卉。供仙夫之餐。黔蠻鄉也。毒霧淫霖。蒸生埜莽。蔓延充塞。道蕪難行。每思如蕪氏法。刈穹蘊崇之矣。無論無朝虹之垂輪。芳苴之戲鳳。洞冥之燭夜。望舒之隨時。吉雲之飼織。離馬地日之招三足鳥。卽卻睡迎涼之葉。護門懷夢之菱。組綸布帛之英。功德文章之秀。概未之見。願安得長壽名葩。媿祖洲返魂之香。驂瓊苑養神之芝哉。或異域音訛稱僞。未可知也。朕聞今廣西柳州。亦有不死之草如茅。食之多壽。此草疑卽山海經之菝草云。

朱草

黔南巖石之間。有草焉。如小桑狀。枝莖似珊瑚。長三四尺。刺之如面。與援神契之言朱草無異。諒卽朱草也。或据三禮義宗難之。謂王者施德有常。則應德而生。與紫脫朱英。皆爲上瑞。安得叢生於蠻域。余案抱朴子曰。今西山謫母所種之朱草。頗異他處。少年湯飲。輒致口鼻出血。是此草可種。不必其嘉祥也。矧古人嘗以之染絳乎。

### 海棠

舊聞海棠無香。惟四川重慶府昌州所產者有之。余至黔。聞大定海棠極蕃。其香最清烈。質之土人良信。 附詩

萬朵晴雲簇曉霞。高燒銀燭仙姝家。春睡方濃慵少力。紅膚卷袖烘輕紗。噉臉恍如醉宿酒。臍脂零粉抹纖手。絳脣惟笑桃李癡。靚粧但覺芙蓉醜。何圖名花出瘴鄉。造物有意深且長。 遑遑佳人在空谷。天狀絕色生清香。從今可消淵材恨。李舟定幸佳郡願。香閣築得香閣高。臨風底事嫌家遠。

### 蠟樹

天下無無用之物。蠶之齧桑作親。蜂之采花爲蜜。構木作羹。萋葉作醬。夫人而利賴之矣。又如枕椰木有麩。文樓木有粉。都句木有屑。羊刺草有蜜。椰子核頓遜樹加蒙嚴樹。檣木蝦蟇丹樹有酒。女國產鹽草。滇南生酸角。西蜀出糖樹。均足適用。又波斯有齊噉一作果。西域出摩廚子。真臘種咸平樹。亦可調羹。以予所見之蠟樹爲尤足貴。取蠟之法。於四月內將蠟蟲置女貞樹上。蟲吸樹脂。兩三月後。漸長如蠶。遂吐蠟。

捲抱樹枝。瑩白成片。九月閒。採取煎。遨作餅。各夷洞。慣畜蠟蟲。漢民亦閒畜之。每二三月。進洞收買。蟲凡一斗。常價用銀一兩四五錢。貴至二兩外。賤極亦一兩。畜蟲亦在四月中。布種女貞樹。函史謂之水欖樹。似女貞而異。但蟲必俟一年方收。蠟則平歲可得。故漢民孳於收蟲。蟲與蠟俱。蠟蟲所生。共在一殼。內大如豆。上而赤色者爲蟲。其下稍白者爲蠟。蟲一樹止。可放三四顆。蠟一樹可放二十餘顆也。本草會編云。蠟蟲食冬青樹汁。久而化爲白脂粉。敷樹枝。人謂蟲。蟲著樹而生。至秋刮取。以水煮溶濾。置冷水則凝結。成塊炙。文理如石膏而瑩徹。可和油作燭。羣芳譜云。蠟蟲微時。白色大如蠨蝨。作蠟及老。則赤黑色。乃結苞於樹枝。初若黍米大。入春漸長。大如雞頭子。紫赤色。纍纍抱枝。宛若樹之結實。蓋蟲將遺卵作房。正如雀甕。蝶蛸之類。俗呼爲蠟種。亦曰蠟子。子內皆白卵。如細蟻。一包數百。凡寄子皆於夏前三日內。從樹上連枝剪下。去餘枝。獨留寸許。令抱木。或三四顆。乃至十餘顆。作一簇。或單顆。亦連枝剪之。剪訖。用稻穀浸水半日許。漉去水。剝下蟲顆。浸水中。一刻許。取起。用竹箬虛包之。大者三四顆。小者六七顆。作一包。勒草束之。置潔淨甕中。若陰雨。頓甕中。可數日。天熱。其子多併出。宜速寄之。寄法。取箬包。剪去角。作孔如荳大。仍用草繫樹枝間。其子多少。眎枝大小。斟酌之。枝大如指者。可寄枝。太細幹太粗者。勿寄。寄後數日。閒鳥來啄箬包。攫取子。勤驅之。天漸暖。蟲漸出包。先緣樹上下行。若樹根有草。即埒草不復上。又防蟻食蟲。樹下須芟刈極淨。次行至葉底棲止。更數日復下。至枝條齧皮入。啣食其脂液。因作花狀如凝霜也。



# 續黔書卷之八

## 孝獸

思南有甌峯。盤亘銅仁、思州、石阡數百里。大木碩少。莫不茂者。騰林拂雲。幽煙冥緬。穹崖造漢。亢石無階。杳無人居。人蹤亦不能到。所產草木多異狀。有獸焉。形類獼猴而大。尾長四五尺而歧端。色蒼黃。鼻露向上。雨卽自縣於樹。以尾塞鼻。或以兩指。爾雅所謂雌也。巢於樹。老者居上。子孫以次居下。老者簡出。子孫搜巖得果。卽傳遞而上。薦老者食。食已。然後傳遞至下。上者未食。下者不敢嘗。先王用以繪於尊彝。取其孝也。案寓屬小而尾短者猴也。似猴而多髻者虞也。小於猴文采蔚然者果下豹也。似猴而大者獾也。大而尾長赤目者禺也。似狢而大者果然也。九真人号歌然。似狢而小者蒙頌也。一名蒙貴。似狢而善躍越者獬鬣也。似猴而長臂者猿也。似猿而狗首以猿爲雌者獼狽也。又名獼狽。似猿而金尾者狨也。似猿而大能食猿者獨也。食猴者獬也。叩鼻者狢也。狢卽雌也。南人名之曰仙猴也。郭景純贊云。禺屬之才。莫過於雌。雨則自縣。塞鼻以尾。厥形雖陋。列象宗彝。余賡贊曰。蟻穴蜂房。君臣道章。鵠行雁序。兄弟燕處。鸞遷雞呼。朋友叩須。鳩摯鷺別。夫婦締結。惟烏能哺。惟羔能乳。愛深養隆。曰母曰父。云何蒼雌。念厥顧復。嘉果摘來。爰薦耄壽。嗟嗟世人。誰無二親。商賈逐末。罍爵空陳。士也遠宦。鐘鼎自榮。絜昔子輿。益母長歎。亦有周磐。感懷魴魚。銜索幾蠹。奉檄樂胥。蒼蒼者天。薄薄者地。罔極鴻慈。豈惟酒食。此而不將。嬾嬾所戲。

囊窠

物之自爲雌雄者。豈爰之類。沛帶山之鵠。或云卽鵠離陽山之象蛇。火眼之狡狴。而囊窠亦然。其爲狀如豚而白。毛如筭。而黑端。夾脾有麤囊。長數尺。能以脊上囊射物。郭景純謂之狃豬。長楊賦注謂之豸獠。通志略謂之山豬。唐本草謂之蒿豬。亦謂之獠獠。吳楚又呼爲鸞豬也。大定府有之。俗名刺豬。苗人拾其囊以爲簪。猶海嶠之用蝦須也。聞南海有泡魚。大如斗。身有棘刺。能化爲囊豬。夫巽爲魚。坎爲豕。巽變爲坎。理或然矣。穆天子傳有囊馬。囊牛。囊羊。郭注囊豨也。與囊豬之囊不同。

水馬

西域以羊臍種土中。溉以水。聞雷而生。臍繫地內。及長。驚以木聲。臍斷便行。蓄草至秋可食。臍內復有種。此物之至奇者也。而人或未之信。史記大宛傳正義引宋膺異物志云。秦之北埒庸小邑。有羊羔。自然生於土中。候其欲萌。築牆繞之。恐爲獸所食。其臍與地連。割絕則死。擊物驚之。乃驚鳴。臍遂絕。則逐水草爲羣。劉郁西行記亦言之。黔之養龍阬。兩山相夾。深池涵焉。嘗出神馬。明洪武四年。僞夏明昇獻馬十。其一白者。首高九尺。長丈餘。乃得之於此也。夫諸毗文臂。渥洼蒲梢。余吾龍友。青海驄駒。往牒可稽已。漢肅宗元和中。神馬四匹出滇池河中。魏黃初閒。於上黨得澤馬。晉孝武太元十四年。滇池縣河水有神馬二匹。唐明皇靈昌郡得異馬於河。皆水馬也。隨巢子云。夏后之興。方澤出馬。良不誣矣。再考襄陽記中廬山有地穴。漢時常有數百匹馬出。遂名馬穴。吳時陸遜復於此穴得數十匹馬。出土中一異也。唐書南詔傳。越

賤之西多薦草產善馬始生若羔歲中紐莎糜之飲以米瀋七年可御日馳數百里馬出於草更一異也。庶物之生。俶詭萬變。魚非羽族。文鯤翔風。獸爲毛羣。靈駢戲水。而且谿邊之狗巢木。地下亦復賈生。圓嶠之蠶眠火。火中又復鼠產。韻外之事。何能具言。昧者不察。徒執游牧攻駒。曷與之循會無而涉元謀之河哉。魏略海西國之六畜皆出水其用水。羊羖爲布名海西布也亦見西域傳。

### 小羊

吾涼出封羊。其背如駝。高者六尺許。春夏之交。青草豐茂。毛澤而肥。食其肉可以胘身。飲其酪可以養性。眞俊味也。余來黔一載矣。雖日飾廚傳。給供驛使。未嘗自求口食。以快端頤。有鄙民饋一羊。辭不獲。受之。不忍無故而殺。養於驛內數月。偶至牧所視焉。輒來依依。裾聞不去。稱之。則十三斤。如六七月之犖羣也。案杜預奏事言魏興北山有野羊。千數百斤。其形不與中土羊相似。廣志云。驢羊似驢。今黔之驢。竟無龐狀大者。而羊復么麼。抑又何耶。

論曰。余聞之卜式云。非獨羊也。治民亦猶是也。惡者輒去。無令敗羣。式其人雖不足取。而言則不易。今之牧民者以神自畜。旣不能禁觚誦之朝飲。復不能如觥觥之觸邪。而肉食者鄙。反視羶首之民而不恤。是何異狼牧羊也。

### 箒雞

逸周書王會解云。蜀人以文鷄。文鷄者。若翬雉。孔晁注云。鳥有文采者。皋雉似鳧。冀州謂之澤特。臨海異

物志云。杉雞常在杉樹下。頭上有長黃毛。如冠。頭及頸正青。如垂綫。今水西出箐雞。高尺許。或畜之。見人輒避去。終不馴擾。而長尾白羽。羽之周遭黑文。緣之如淡墨所畫。是箐雞與杉雞同。亦文翰之類也。

人首魚

癸亥之五月。鎮遠霿霖。無江暴漲。上流夾岸人居。埒雞牢豕。悉被沖汎。鎮之漁。咸飛櫂爭取。忽洪波卓立。盤渦雷轟。見一巨魚人首。長徑丈。鬢鬣殷紅。衝網駛去。趙子海涵自鎮遠來。親見爲余言之。嘗考竹書云。禹治洪水。觀於河。見長人白而魚身。出曰。吾河精也。徐鍇稽神錄云。謝仲玉者。見婦人出沒水中。腰以下皆魚。述異記云。查道奉使高麗。見海沙中一婦人。肘後有細紅一作鬣。命扶於水中。拜手感戀而沒。乃人魚也。嶺海異聞云。人魚長四尺許。體髮牝牡人也。惟背有短鬣。微紅。注。卽山經西海之陵亦作魚也。鄧元錫物性志云。姑射山有鯨魚。人面人手魚身。見則風濤起。夫蚨青類人首。予羅類人足。咸車類人男陰。文嚙類女陰。亦名東海夫人。凡此瑰異。悉產巨浸。黔江何以有此。如以元錫之言。見則有風濤之異。今夏大夷晏浪。雍觀潛蹤。未嘗起颺颺而驚衍溢也。殊不可解。

鱸魚

金盞玉脰。舊稱東南嘉味。六書故謂其肉毳者尤美。案灰有二種。肥鱸。海中有之。皮緊而肉厚。爛鱸。江海俱有。比肥鱸差小而味淡。玉屏之平江產鱸。巨口細鱗。肉白如雪。不終日。色不變。而有四頤。天生膾材也。然不能如北固山下。一出手。便釣得四十九枚。如謝朓所云。或謂天下之鱸皆兩頤。惟松江鱸四頤。非壘

不知盧清臣殆亦倖於營廷之魚矣。崑山有三顯鱸

### 小蟹

夢谿筆譚云。關中無蟹。偶收得者。怖其狀。以爲怪物。有病瘡者。縣諸戶。則立瘥。言鬼畏之也。黔爲鬼方。卽無腸公子。郭索橫行。彼鬚首鑱耳之倫。且易而翫之矣。余來斯邦。暇則徵風采俗。訪之無有也。後乃知鎮遠之鐵谿產小蟹焉。與箴魚沙鰕。潛响沫於澗石。而鎮寧之清泉中。產異蟹。或赤或紫色。極鮮妍。雖洛水文鱸。珠海石蚌。亡以險也。夫波斯之蟹。與神搏。江南之蟹。與虎鬪。海陽之蟹。專車。女丑之蟹。千里。而北溟之蟹。一螯加於山。善苑國之蟹。長九尺。百足四螯。尤爲足異。若茲之纖纖。其不足篝火以尋也。審矣。儻使鸚鵡之嘴。爬沙熊谿。而虎豹之鱗。擁劔泮江。當霜天菊黃。壺曾竹之馨。醪盤都雲之香。橘左持。彭越右把。長卿蹈吏部之疎狂。藐監州之騁睨。笑蔡謨之替職。嗤陶穀之妄評。則予也。樂尊前風味。忘口裏雌黃。亦可以無異域之歎。乃冠裳之狙。竟畏毒霧而不生。或生之而大。僅如指。不能供老饕之一嚼。豈不慎哉。

### 圓蛇

蛇之善者。惟升卿。其惡者。曰博叔。然予蛇食塵。蚶蛇噬鹿。巴蛇吞象。活褥捕鼠。要皆形狀宛若。可爲趨避。未有蹤跡詭異。厥毒奇酷。如圓蛇者也。圓蛇產古州八萬土司中。圓如卵。有五采文。或山水。花鳥。竹木。歷歷如績狀。同六合石子。人見之。無不欣愛。拾而撫摩之。不忍遽舍去。少頃。得人氣。於中心。迸出一頭。口目畢具。舌如火輪。齧人無幸免者。人斃處。草木枯槁。泥土焦烈。人不敢由此行。皆迂道以避。三年始復。然其

土猶毒。苗人以簋笏矢插其處。七日夜。射人卽瘞。酷於狸子。燹銅之鑄。又有脛蛇。長尺有二寸。見人輒躍起數尺。跌爲十二段。須臾復合爲一。卽淮南子所謂神蛇也。田山薑紀之特詳。

唧唧

山石之間有物焉。形似蛙。又似鮎。色青。味鮮美。苗人得之。進上客。呼之爲唧唧。案字書無唧字。其從土者。土精也。宋時徐廷評監廬州酒稅。河次得一物。如小兒掌。無指。懼而埋之。或曰。此白澤圖所謂唧也。食之多力。又一名封。與此形狀縣殊。案交州記。陶璜築城於土穴中。得一物。白色。形如蠶蛹。無頭。長數丈。大十圍。輾輾能動。割復肉如豬脂。以爲臠。香美。遁甲開山圖。雲師生霍山。長五六寸。有毛似兔。雨時出在石上。肉甘可炙食。或曰石蠶之類。卽雨虎也。本草云。石蛤。在石中藏。蟄似蝦蟆而大。黃色。能吞氣。飲風露。可食。疑唧唧卽石蠶石蛤之類。又白澤圖云。千年木中有蟲。名賈詘。狀如豚。食之。味如狗。尤奇也。案賈詘卽彭侯。

九香蟲

余髫年在外。馬足車塵。閒關萬里。得勞疾。恨無寧蘇之我遣也。目見潢池弄兵。梁渠舞羽。黔首流冗。得痛疾。恨無萑蒞之我惠也。改官於外。無吏才。牒訴倥傯。敲撲喧囂。耳遂以聾。恨無文莖之見贈也。民陝輸而苗剗。上下嵒窳。是非區霧。憤放手者之類。越貨也。則忿之甚。思得帝休服之。握符衝塗。日惟供億。稱妮之是急。無瞬暑展卷。幼時所誦經書。茫如膠寐。是爲忘疾。思得迷穀佩之。時復勘地巡稼。登峻岑。冒毒霧。飢飲不時。得痔疾。誰則投我以赤翁之樸烏。蛇尾之虎蛟者。兼此六疾。百里何堪。乃者挂冠引退。囊無阿

塔甌無洗。耙飢腸時作鐘球鳴也。暇輒覽列仙傳。慕葛稚川之爲人。便有意縱志舒節。以馳大區。與造化者俱。又念夙無仙才。未必有仙骨。私覬選崔文負局。食我以黃散。餌我以紫丸。庶蝸甲濁穢。拾階霄霓。迅千靈於一朝。方塵劫於俄頃。茲聞畢節之赤水。出九香蟲。服之身輕。喜甚。詢之土人。言蟲生澗水中。春夏出遊水面者。不可用。秋冬潛伏湖石。土人掀石得之。售人。服法用十四枚。微火炒去殼。翅及足。七枚去殼。翅足生用。每服一生一熟。作一次嚼食。白湯下。日服二三次。俱可用完十四枚而止。儻余得是蟲也。不羨苟扇之丹砂矣。或曰。服之尤宜子云。







黔 游 記

陳 鼎 著

本館叢書集成初  
編所選學海類編  
及龍威秘書皆收  
有此書學海本在  
前故據以排印

# 黔遊記

清 江陰陳 鼎子重著

鎮遠府河勢紆曲。水黃平州萬山中來。峯巒聳拔。上出重霄。無城郭。依山爲衛。隔河有衛城。今省衛入縣。實以守兵。誠控御良策也。水路上阻諸葛洞之塞。止可到此。故舟車駢駘。貨物聚集。下十五里卽兩路口。乃通黎平之道也。黎郡北連楚壤。南接西粵。中有九股黑苗。聚落於古州。八萬方二千餘里。泉甘土肥。出五金礦。民物豐阜。俗以十一月爲歲首。其地家蓄肥牯。織五色布。每元旦。殺牛焚布以祀天。自古不服中國。今爲仲家誘出。焚掠邊境。黎平受害特甚。出鎮遠西門。卽油榨關。雖不甚險。實鑿開一綫之道也。過關平路十里。至相見坡。三重迭起。高皆千仞。計程有三十里。登首坡則尾見。立中坡前後顧。則首尾見。陟尾坡則首見。行旅者此以手招。彼以口答。應響若咫尺。而不知三十里之遙也。華嚴洞中有大士像。儼如雕琢。洞深數十里。諸景畢具。大有洞天之勝。

望城坡。登其巔。可望偏橋衛城故名。南里許卽諸葛洞。相傳武侯征蠻。鑿開運糧者。然非洞也。乃兩山陡立。中夾一溪。後爲大水所衝。兩崖巨石梗塞中流。舟楫難行。明黔撫郭子章開通。直達黃平。旋復塞。國朝制軍卞三元復濬通舟。民稱便焉。今復巨石壅斷。卽如葉漁舫不能行矣。諺曰。若要此洞開。除非諸葛來。豈其然歟。傍有半蓮洞。狀如半朵蓮花。妙高臺在其北。今廢。崖半有武侯。蕭公。晏公。楊四將軍石。

刻像郭十二公碑記在焉。

偏橋本衛。近省入施秉縣。移治治焉。下七八里有白雲洞。深十里許。中有蛟龍獅象石牀石凳等景。頗可遊觀。

飛雲巖玲瓏奇絕。巖下有溪。石梁亘之。度橋歷級而登。仰窺雲際。覆如華蓋。乃飛雲巖也。蛟龍獅象碧乳滴成。上垂下伏。鱗甲宛然。巖外三峯壁立。高與檻齊。有亭翼然。臨於峯上。飛泉潺湲。冬夏不絕。或曰巖性好潔。昔有穢者信宿于此。則瀑水突至。瀾漫澣濯。再穢復澣。巖下有洞。深不可測。或云達鎮遠。後山西卽月池。上有月潭寺。松杉遶屋。蒼翠參天。內有王陽明先生碑記。言天下之山萃于雲貴。連亘萬里。極天無際。往來之人。日攀援於重巖絕壑之間。雖素有泉石之癖者。一陟雲貴之途。皆踣困煩厭。非復夙好。至此卽傭儔俗侶。曾不知有山水之觀者。亦徘徊顧盼。相與延戀而不忍去。可謂善寫此巖者矣。

興隆衛卽古牂牁郡。今省入黃平州。移州治于內焉。歷三十里。渡重安江。江之上流接新添衛諸山之水。合平越葛鏡橋麻哈江。下入古州。八萬經生苗地二千餘里。達黔陽。合大溪趨洞庭。以入大江者也。

大風洞卽道書所謂時蒼洞天也。又名雲溪洞。後門在楊老。西與平越接壤。蓋深二三十里矣。中有蒼龍白虎石鐘可扣。石鼓可搗。入里許。則涼風颼颼。竦人肌骨。雖六月。須披裘以遊。至半有天穴如斗。斜逗日光。照見一切。洞外有亭。殊可憑眺。

竹王祠在楊老驛。去清平縣三十里。三月間香火極盛。相傳漢時夜郎女澣於澌水。忽有巨竹三節。上流

浮下中有兒啼聲。剖得一男育之。及長有材武。自立爲夜郎侯。以竹爲姓。能以威德撫諸蠻。蠻皆歸之。武帝平西南彝。侯迎降。封夜郎王。後乃殺之。蓋猜其欲叛也。羣蠻思之不置。請立後。牂牁太守吳君以聞。乃封其三子皆爲侯。俱能以德撫衆。旣卒。羣蠻立祠祀之。黃絲驛亦有其廟。香火亦盛。

葛鏡橋跨麻哈江而造。兩山壁立千仞。相束一江。水黑如膠。有風不波。霧罩山昏。鮮見天日。昔皆懸絙以渡。沈溺者衆。明嘉靖閒。里人葛鏡建橋以濟。旋圯。再建復傾。乃齋戒沐浴。率妻子刑牲以誓曰。橋之不成。有如此江。遂破產經營。卽成。至今賴之。

平越郡城內有張邈遺修道故跡。邈遺名三丰。閩人。洪武閒以軍籍戍郡。蓬頭赤足。丐於市。人呼爲邈遺翁。於高真觀后結茅爲亭。閉戶靜坐。與指揮張某善。嘗與飲博。指城南月山寺地曰。葬此可封侯。張從之。後果以戰功封隆平。今亭前一池。冬夏不涸。旁有一桂。亦其手植。府南五里。卽武勝關。隔溪絕壁。有三丰遺照。戴華陽巾。側身攜杖西行。儼然圖畫。旁有明撫軍郭青螺書神留宇宙四大字。下有夜滴金橋。雖晴夜亦雨灑數點。又有晚霞斜照。不計晴雨。俱有斜暉。

憑虛洞去新添衛十里。衛省入貴定縣矣。洞深十里。中有瀑泉。聲如雷吼。俗呼母珠洞。下五里甕城橋。長百餘步。其水入蜀。

古福洞深四十餘里。中有大溪。水聲如雷。昔有持炬入遊者。見蒼龍偃息溪中。鼾聲如雷吼。懼而返。余入遊時。當冬月水涸。溪水僅尺。遂褰裳以渡。其中景物。真天造地設。浮圖高十六級。每級三丈餘。皆玲瓏。

有階可登。每級俱有瞿曇像。香爐炬臺。皆天生成者。石鐘石鼓。擊之聲聞洞外。萬山俱響。百谷皆鳴。數十里都震動。苗人盡驚咤奔視。次日下午。從後門出。迂道百五十里。而抵龍里。餘從者尙伺于洞口。菴中馳騎召之。乃來。

龍洞本衛也。後改爲縣。南關外有留人洞。幽靜可愛。客至每留戀不忍去。然淺迫。止可容數人耳。

觀音洞深五百餘里。從洞中行。乘七日炬。可達都勻境。從來少人窮其穴者。明有直指方君曾盡遊焉。余有好奇之癖。因具十日炬。裹一旬糧而入。初數里甚宏敞。愈入愈窄。止可容一身。若是者十餘里。乃後愈窄。側身以行者。三里。三里之外。則可馳五馬。駕高軒矣。中有樓臺殿閣。人物花鳥之景。皆碧乳融成者也。至七十里。舉炬四照。則無涯矣。因循石壁以行。壁之畔有泉一泓。甘香如醴。泉之畔有銅釜一。可容十升。壁上有題句云。隆慶三年錢塘方紹宗於此。煮泉筆墨淋漓。字畫遒勁。大可愛。是蓋直指公所書也。余亦續題云。康熙十年江陰人陳鼎亦於此。煮泉行十餘里。則不復曠蕩矣。竟行九日半。始得達後口。乃都勻府之東。盡境空麻地方。再五里。卽苗彙中矣。

龍洞去貴州省城五里。淺窄不可遊。省城之水。皆流入陸廣河。下烏江者也。自省以西。山川迥異。皆箇箇自生。不相聯絡。無復瞻顧依迴之狀。或如鐘鏞特豎。或如鎗槩轟天。或如烽墩孤立。俱平地突起。遠道而生。遠山則連亘插天。童然不毛。田皆石底。上惟尺土。五日不雨。則苗枯槁。世所謂雨師好黔。言黔中無五日不雨也。雨師豈真有所好哉。良由彼蒼愛人之至。惟恐禾荒民饑。故無五日不雨耳。

棲霞山在省城東二里。孤峯特立。峭壁凌虛。由北坡曲折而上。至巔。則平坦如枰局。四高中注。透廊西行。入大士洞。登捨身巖。穿紫竹徑。西升傑閣。遙瞻會城。烟火萬家。歷歷在目。

涵碧潭。在會城南。合定廣威平之水而入。南明河。越霽虹橋而東行。將折而西北。至此淵而不流。卽涵碧潭也。上有釣鼈磯。跨以石梁。明郭撫軍築以障水者。磯上有甲秀樓。左武侯祠。右維摩閣。俱近碧潭。頗可遊覽。南明河水鳴。會城必有回祿之厄。

相寶山。在會城東北里餘。上有屏山寺。寺西一巖。周擁大樹。踞巖西望。可窮千里目也。朝陽洞。在會城銅鼓山傍。文筆峯側。幽深四十餘里。頗可遊覽。乘三日炬。則盡其勝矣。龍井。在會城內西北隅。冬夏不竭。大旱三年亦不涸。泉甘而碧。合城皆賴之。

紫池。卽紫泉。發源於鬱江。乃遯水與牂牁江之源也。流入洞庭。匯于大江。而入海。扁鵲泉。在會城西十餘里。黔靈西南山中。廣不盈尺。一晝夜百盈百縮。置表以測。莫之或爽。俗呼百刻泉。又名百盈泉。又名聖泉。味甘而冽。久服可愈瘋。黑髮駐顏卻老。

黔靈寺。乃撫軍曹升吉所創。初荒山也。寺在山巔。盤曲而上者三里。有泉一泓。可供百衆。大旱不涸。寺后一池。冬夏不竭。周多竹木。頗幽勝也。

白雲山。在會城西南定番州境。乃明建文帝晦跡處。有流米洞。米自洞中流出。以供帝。帝去米絕。跪接泉。相傳龍神獻帝。在峯半峭壁間。須跪而汲者。

谷水龍。在會城西南五十里。有大寺。容衆數百。去寺十里。有泉從石壁流出。甘美清碧。居人咸飲之。遇有兵變。則色赤如血。

黔省苗蠻種類甚多。有花苗、東苗、西苗、牯羊苗、白苗、青苗、谷蘭苗、紫姜苗、平伐苗、九股黑苗、天苗、紅苗、生苗、羅漢苗、陽洞苗、黑羅羅、白羅羅、八番苗、打牙犵狓、剪頭犵狓、木狓、仲家苗、土人苗、羊黃苗、蠻人苗、楊保苗、狗耳龍家苗、馬鏡龍家苗、犍人、狗人、宋家、蔡家。共三十餘種。風俗各異。惟宋家、蔡家、馬鏡龍家。乃戰國時楚伐宋、蔡、龍三國。俘其民。放之南徼。流而爲苗者。知中原禮義。衣服祭祀。婚嫁喪葬。揖讓進退。一稟於周。而花苗、東苗、西苗、牯羊苗。四種淳朴外。其餘皆不可以禮法教者。惟土司官威刑始得以制之。諸苗中。仲家最惡而險。通漢語。知漢書。到處皆有其種。蓋其商賈於諸苗之中。如徽人、紹人之於中原也。然秉性匪良。專造藥弩。種蠱毒。構結生苗。劫掠百姓。爲害最烈。捕則竄入深箐。無從追緝。生苗者。無頭目。不服土官黔束。雄而強者。卽爲長。或聚至數百人。卽僭號稱帝。儼然冕旒黃衣。而端拱于荒山之巔。以受數百人之朝賀。而呼萬歲。官兵至。則遁而之他山。逢人卽殺。見物卽劫去。司官或統人四面截殺。則盡之矣。他日又有羣聚者。仍然焚掠。而仲家多通諸苗之言。多識犍文之人。復誘而入內地。劫殺商賈。爲害不可勝言。田綸霞先生撫黔。設鵬剿法。始不敢出。四境獲安。苗俗每歲孟春月。男女各麗服。相率跳月。男吹蘆笙於前。以爲導。女振鐸於後。以爲應。連袂把臂。盤旋宛轉。各有行列。終日不亂。暮則挈所私歸。謔浪笑歌。比曉乃散。聘貲視女妍媸。而定多寡。必生子。然後歸夫家。惟紅苗爲甚。每至立



春日擇男女之麗者。扮各故事以迎于市。爲樂男子之麗者。卽古之潘安。宋朝有不及焉。女子之麗者。漢之飛燕。唐之太真。亦無能出其上矣。此種女子。欲購之者。牛馬當以千計。而始首肯。男子皆不樂爲。龍陽君有犯之者。輒自殺。

刺梨。野生。夏花秋實。榦與果多芒刺。味甘酸。食之消悶。煎汁爲膏。色同楂梨。四封皆產。移之他境則不生。每冬月。苗女子採入市。貨人得江浙豫客買之。苗女喜曰。利市得佳客交易也。本省人爲之買。則倍其價。江南人或物色之。則舉筐以贈。曰。愛莫離。愛莫離者。華言與你有宿緣也。或有調戲之者。則大怒。曰。落勿渾。落勿渾者。華言沒廉恥也。所謂物色之者。非有他意也。乃婉容愉色以問其出處。故喜悅也。山峒中諸苗男女。見吾輩鮮衣。奴馬僕從呼擁而至。舉家皆出而膜拜。有不知者。輒大聲呼之。而出曰。睨漢郎。睨者。視也。漢郎者。漢官也。或下馬過其家。乞水火。必舉家男女跪而奉之。其愛慕中國如此。惜乎無有以化之者。苟有化之者。皆相率而入禮義之域矣。

脛蛇。出土司中。長尺餘。伏草莽間。見人輒躍起。跌爲數段。少頃復合爲一。其色如白金。光亮可愛。悞拾之。觸毒卽斃。其出入有度。捕者置竹筒徑側。彼以爲穴也。而入其中。急持之。則完。稍緩則自碎矣。故名脛蛇。暴乾以去瘋癩。視其身上中下以治頭腹脛股。罔不効也。又可接斷骨。價值兼金。

圓蛇。狀如石卵。斑斕可愛。誤持之。得人氣卽化爲蛇。嚙人卽斃。尸不敢收。五里內外。人不敢行。觸其穢氣。腫脹而斃。苗人三日後取竹矢插死所。七日取用。中人輒斃。

苜蓿味辛。乃荑蕪所造。食可消瘴。羊桃藤取汁。可膠巨石。他處斷而膠處如故。山中造石梁者。常以之相續。恆數十丈。駕空以渡。所圯者輒非所膠處。或中斷而兩頭喬然不墜。苗人以木板續之。行旅往來無恙。

雞墪黔中亦產。但不如滇之蒙化者佳。有紫白二種。白者恆殺人。初秋生蔓草中。始奮如笠。既如蓋。漸則披紛如雞羽。故曰雞。以其從土中出。故曰墪。

燕草卽燻麻。生於澤畔。多刺。螫人手足。輒腫脹痛不可忍。逾日方平。人比之蜂蝎虻也。土人採以沃湯。可療瘋瘡。

凱里鉛。可治蠱。中毒者取以浸水作汁飲之。卽愈。與蕘荷葉同効。

清鎮縣。故威清衛。有兩尖峯。平地突地起。俱高千仞。上各有廟。每仲春。遊者絡繹。

安平縣。卽平霸所。有喜客泉。客至則湧如沸。客去則否。十里沙竹。有珍珠泉。又名貪泉。平時無水。焚楮帛。則泉湧如沸。高噴數仞。

天台山上有神女廟。女冠所居。翠樹葱蔥。頗可遊覽。有泉一勺。卽十萬人飲之不竭。

羅漢洞。深十餘里。中有泉一泓。其色如黝。甘香清冽。煮茗則色如渥丹。飲之脣齒皆赤。七日乃復。羅德山有石羅漢。遠望酷似。

安順府。自清鎮抵滇界十三驛。俱爲所轄。乃黔西孔道也。出西關四十五里。有龍井。每年立秋日。井內發

聲如鼓聞數十里。名龍打鼓。主來歲雨多。

鎮甯州。本安莊衛。今省入州。移治於內。此路山川。又一變矣。山亂如麻。俱高萬仞。山巔突起尖峯。如槩如筍者。指不勝屈。

白水自東北高山峯半流下。歷數十里而至白河。懸崖數仞。寬十餘仞。白練飛流。怒濤翻湧。隔岸有碑。題雪練晴川四字。犀牛潭。有五色雲起。潭有伏犀水。從峭壁直下。兩水相激成霧。飛瀉數百步。霑人衣裾。相傳潭中逆變時。解餉官棄金十餘萬於內。人多垂涎之。有善泅者。沒水以求。一犀熟睡波底。遠皆珍寶。遂擇巨者攫之以行。犀覺。逐至岸。泅者與之鬪。力竭。擲還。犀始退。類齊東之語。然山陰呂忞。名士也。作歌以記其事。摹寫極工。好事者書于廟壁。姑妄聽之耳。潭西有望水亭。可凭眺其勝。此水合盤江而趨粵西以入海。

霜陵橋。卽關索橋。水從西北萬山來。亦合盤江而趨粵西以入海。關索嶺爲黔山峻險第一。路如之字。盤折而上。山半有關壯繆祠。卽龍泉寺。中有馬跑泉。甘碧可飲。相傳壯繆少子索用鎗刺出者。寺內大竹千竿。青葱可愛。寺外道旁有啞泉。今已閉。碣曰亘古啞泉。西巔卽順忠王索祠。鐵鎗一株。重百餘斤。以鎮山門。按陳壽三國史。壯繆長子平。從死甯沮之難。次子興。爲侍中。數年歿。未有名索者。意者建興初。丞相亮南征。從者其索乎。有功于黔土人祀之。黔人呼父爲索。尊之至。而以父呼之耶。相傳索從亮南征。爲先鋒。開山通道。忠勇有父風。今水旱災癘。禱之輒應。故血食千古。一路至滇。爲關索嶺者三。而滇

中亦有數處。似爲壯繆子不謬也。或謂關鎖嶺之訛。程江夏滿江紅末句云。當年陳壽是何人。史獨缺。誠爲千載疑案。然正史缺者頗多。不獨索一人已也。但不知王實甫作三國演義。據何稗史。而忽插入索乎。是皆不得而考也。下嶺卽關山驛。自此以西。俱高峯插天。煙雲無陰晴。瀾漫山谷。

象鼻嶺兩峯壁立相夾。一嶺如象鼻然。闊三丈。長百餘丈。登其西畔高峯。黔東諸山如培塿矣。

永甯州俗呼頂站。本驛也。今移州治於內。城北二里許。有觀音洞。深十里。秉燭快遊。亦勝事也。內有石牀。一光潤如大理石。坐臥則錚錚有聲。反側閒如有絲竹亂耳也。好事者鐫題于石。曰遊仙榻。三十里外新鋪。西有潭。深百丈。潭旁石壁高千尋。如千層餅狀。亦奇觀也。

鐵索橋。駕盤江而造。江源出自烏撒苗境深山中。冬日水涸。始見其泉。凡七十七處。俱臨於一谿。遠曲靖道。畢節而注安南縣。合粵西烏梅江而下海。入滇所必由也。兩峯夾峙。一水中絕。斷岸千尺。飛流如駛。蓋天設以界黔滇者也。往往舟濟多覆溺患。明天啓閒。監司朱家民始冶鐵爲絙者三十七。長數十丈。貫兩岸。巨石閒。覆以木板。相類棧道。然絙長力弱。人行其上。升降不已。身隨搖撼。不克自持。車騎必下。前者陟岸。後者始登。若接武而行。益增其險。曩燬於逆。今則兩崖鑿以巨石。柱以強材。經以鐵絙。緯以平板。上覆木屋。工程牢固。人可駢肩。馬可聯轡。卽魚貫列伍而行。亦不驚矣。上坡不過里許。然陡峻難行。不亞上關嶺也。

安南本衛。近改爲縣。城東里許。有州牧曾公異撰墓。公四川重慶府榮昌人。前朝安南衛與永甯州同城。

丁亥賊薄學。分。衆禦之。兵潰被殺。同城指揮某求尸葬此。墓旁有峯插天。上有元帝廟。南關亦有一峯相類。上有玉皇閣。俱可登眺。閣下卽南豐寺也。語云。熱盤江冷頂站。行至安南討火向。八十里閒。寒熱三變。天地之閒。至此獨異。境近粵西。多瘴。行旅須慎。中者急覓黃花根。取汁服之。卽愈。自南關上坡。至關將軍飲馬泉。歷五雲坡。過仙人洞。經老鴉關。皆斜盤百曲。但石道寬平。可行耳。道旁石刻朱書。烏道千重四字。頗壯麗。度萬人橋。至江西坡。山嶺差平。然曲折迂迴而上。深澗大壑。心目茫然矣。

普安縣本新興所。設吏治焉。出南門。上坡至觀音洞。過九峯寺。徧山皆羅漢松。黔山俱童。自此始有林木。山楂樹高數丈。谷中多白雲。陰晴皆然。度破橋。至鸚哥嘴。嘴嶺甚險。有鸚鵡寺。聯額皆制軍王繼文先生書。大殿制府蔡公一聯云。一峯天半聞鸚語。萬籟松閒只馬蹄。語佳絕。自此以上。俱山上生山。大山之水。俱注溪澗。小山之水。衆道環遶。無趨洩之道。俱由地中行。或流入洞。當春夏霖雨。山巔汎濫如湖。秋冬水涸。又成陸地。

白雲坡甚峻。兩山壁立萬仞。中夾一澗。橫流淙淙。俯而視之。心目蒼茫。普安州當黔滇之交。高山萬重。俱出雲表。關嶺雖峻。亦無出其右也。

碧雲洞在郭外數里。石屏當門。遊者撫摩。光潤如玉。幽泉旁流。聲如擊筑。內有石磬。扣之錚錚。入洞甚黑。行百步。豁然開朗。卽一線天也。石罅漏日。洞見一切。黃匏大如斗。瞿曇大士羅漢各一。或倚屏獨立。或傍榻跏趺。或踞崖仰視。鬚眉宛然。絕壁數仞。有龍上昇。鱗甲欲動。爪牙若舞。再進則巨浪排空。驚濤湧。

地一溪橫流。然炬以照。旁有一徑甚窄。側身可入。盤旋數轉。丹竈藥爐在焉。轉灣一浮屠。轟天玲瓏巧絕。再行里許。有石田千頃。石閣五楹。石榻石墩具焉。出洞則在峯頂。俯視萬山。竟同邱垤。

雲安坡俗呼雲南坡。高萬仞。極其險峻。至巔西道闊僅數尺。如一線相連。止可一騎竝行。稍一失足。則人

馬俱墜。如轉圓石於千仞之山矣。仰視諸峯。皆逼霄漢。諸蠻多聚族而居。山半耕鑿焉。

亦資孔彝語也。有驛在焉。其地名有革納。撒麻。蛾螂。魯尼。多羅矣。納者察。皆苗中鄉談。

平彝里。前朝平彝所屬境也。過此十里。卽滇南勝景。則雲南境中矣。語云。萬里雲南。自江甯至雲省。實五

千餘里耳。然道里遼闊。每百里抵江南二百餘里。諺曰。貴州沒天理。十里當五里。統而計之。則萬里之

說豈虛耶。

梵淨山在銅仁思南之交。下小上大。土名飯甑山。高數千仞。有古刹六。春月進香者日以千計。

鏡山亦在二郡之境。有石如鏡。相傳八月十五夜子時。萬國九州之影。悉現石鏡中。

黔中諸郡皆荒涼。惟思南府最盛。有水道通舟楫。貨物俱集。而人文亦可觀。較之石阡。思州。有天壤之隔

矣。烏江臘月晦日夜。水中見圓月影。其光不減望日。而娑婆樹影亦明灼如月中。

天花產峭壁間。大如車輪。色赤如火。光映兩山。皆如渥丹。四月以後卽謝落。

威甯府本烏撒衛地也。國初吳三桂平安氏地。開四郡。設府治于烏撒。土產馬。高猛殊他產。餘無所紀也。